


# BONZAMBE ELIMBOLAMI

 Matondi, Ndeko Carlson. Pe mbote na bino nyonso, bandeko mibali pe bandeko basi kati na Nkolo. Ezali. . . Ntango mosusu, natatabanaka mwa moke mpo na komata awa, ntango nazoyoka matatoli ya kitoko boye, pe nyonso wana, ndenge nasali yango na ntongo oyo. Pe, na bongo, ndeko mwana mboka kati na mpasi pe konyokwama, lokola ndeko na biso ya Batiste, ya mobali pe ya mwasi, baleki na yango; lokola ngai moko ba—Batiste ya kala, ya lingomba Batiste Missionaire, pe—pe nayebi oyo yango esalaka soki bandeko na yo. . .

<sup>2</sup> Likambo ndenge moko ekómelaki ngai. Bandeko na ngai moko babwakaki ngai libanda, pe bazuaki likanisi ya kobengana ngai mpo nakómaki elema. Pe nayaki komona, pe namesaná koloba yango na lolenge moko ya kobombana: “Soki nazali elema, bótika ngai kimia, mpamba te nazali na esengo ndenge oyo koleka ndenge nazalaki ná makanisi na ngai malamumu.” Boye, oyo wana ezali mwa filozofi moko boye ya ngai moko, oyo nazalaka na yango. Pe—pe na ntembe te nazali kosepela na—na ntango oyo nazali na lolenge yango.

<sup>3</sup> Pe ndeko na biso ya Eglise de Christ awa, ndenge tomesána kobenga yango, to ya Campbellite. Pe nazoyeba lisusu ete bazaláká solo kobundisa mayangani na makasi nyonso, liboso ntango tobandáká. Kasi, boyebi, biso pe tozalaki na moko, nkombo na ye Polo, na ntango moko ye pe azalaki bongo, pe akómaki moko na biso. Boye, ezali ya solo. Nakanisi ete eloko oyo balukaka na momesano, ezali nde bomoi oyo ozali kobika. Boyebi, malamumu óbikela ngai liteya na esika óteya ngai yango ntango nyonso. Naza. . .

<sup>4</sup> Eleki mwa ntango, motei moko ya lokumu, mobali moko malamumu ya Plein Evangile, bino—bino nyonso boyebi ye, nabanzi, ezali Rev. Booth-Clibborn, ateyaka Nsango Malamumu na minoko nsambo ya kokesene. Azali na mayele mpenza. Pe ngai. . . Azali na mayele mingi ya bóngo. Pe mokolo moko, tosalaki mobembo elongo, ye ná Ndeko Moore ná ngai, pe tozalaki kosolola likolo na likambo moko. Pe ngai nazalaki na likanisi ya kokesene na oyo ya ye, abalolaki miso epai na ngai. Alobaki: “Oyebi mpenza Biblia na yo te.” Boyebi ndenge Ndeko Booth akoki koloba yango.

<sup>5</sup> Nalobaki: “Ya solo, Ndeko Booth, kasi nayebi Mokomi na yango malamumu mpenza.” Bongo, bongo na—nalingi. . . Boyebi, ezali te koyeba Liloba na Ye nde ezali Bomoi, kasi “koyeba Ye ezali Bomoi.” Ya solo. Bomoni? Náyeba Liloba na Ye to te; soki bobele nayebi nde Ye! Pe yango ezali mpenza Solo.

<sup>6</sup> Na ntongo ya lelo, nazalaki kopesa mbote ya loboko na lisanga kitoko oyo ya batei awa. Pe ezalaki na oyo afandaki

awa... Nalingi kokumisa moto moko te. Kasi mobali oyo ya moindo akotaki, ndeko oyo, afandaki wana. Nalobaki na sekretère na ngai awa: “Tala Moklisto ya solosolo.”

7 Komona yo, nakanisaka mingi Mpaka Smith, oyo azalaki na Eglise de Dieu en Christ, nabanzi. Nazalaki koteya mingi mpo na bango kuna, pe—pe nazali komona ye kino lelo. Akokanaki mwa moke na ndeko oyo, bobele ete ye azalaki na mwa moustache ya pembe. Nazalaki kokota na ekuke ya sima, pe nabosanaka te maloba mobange wana azaláká koloba; otomboli miso, basantu nyonso bazalaki koyemba, boyebi. Pe elenge mwasi moko azalaki kofanda na litúmu. Loyembo oyo nazalaki kolinga mingi ezali *Netola Ye*. Pe bango nyonso bazalaki kobeta maboko, lolenge ya ba-pantekotiste, boyebi, *Netola Ye*. Bazalaki kolinga ngai, ngai pe nazalaki kolinga bango. Pe ntango tozalaki kokota... Ye amesanaki kofanda kuna, ná motó na ye *boye*, likolo na mesa, pe azalaki kaka kotala bango, boyebi. Azalaki koloba: “Kota, mpaka. Pemisa ekoti na yo. Pemisa ekoti na yo.”

8 Ndeko mobali oyo; pe bongo nayokaki ete moko na bayembi nzembo na Nzambe oyo nalingaka mingi, azali mwasi na ye. Pe nasali nyonso oyo nakokaki kosala, mpo áyemba. Pe, na bongo, asengaki ete batánga ye te, pe nayebi oyo yango elingi koloba. Kasi ngai moko nakobianga ye, soki akoki, koya koyemba.

9 Ee, yo nde ndeko mwasi oyo ayembaki—ayembaki loyembo wana, *Kuna Na Masuwa*, mokolo moko na ntongo, epai ya ba-Hommes d’Affaires Chretiens? [Ndeko mwasi alobi: “Iyo, misie. Iyo.”—N.D.E.] Nazolikya ete mwasi na ngai akoya na mposho oyo, pe nazali na mposa áyoka yo, mpamba te nakumisaki yo mingi mpenza. Pe soki bozangi yango, na bande, tokotala likambo yango. Nalingaka nzembo ya kitoko wana.

10 Pe, nazaláká koyebisa bato, na—nazaláká kokoka koyemba ata moke te. Oh la lá, nazalaki million ya ba-kilometre mosika na likambo yango. Kasi nazalaki koloba: “Soki okómi na Lola pe obandi kofanda na ndako na yo monene pe kitoko, oyebi, kuna Likolo,” nazalaki koloba, “mosika kuna na nse na ngomba, kuna sima na zamba, mwa ndako moko ezali kuna. Ekozala nde oyo ya ngai. Pe moko na ba-ntongo oyo, ntango okobima na mbalasanani pe oyoki moto moko atelemei kuna, azali koyemba: ‘Ngolu ya kokamwa! oyo mongongo kitoko, ebikisi moto na mawa lokola ngai!’ Yo loba: ‘Nkembo na Nzambe! Mobange Ndeko Branham sukasuka alongi.’” Ekozala ngai kuna nde bokoyoka, komeka koyemba.

11 Epai ya bandeko na ngai Baklisto, pe epai na... Nabanzi ete ndeko mobali moko atalisaki biso ye, na ntongo oyo, ete azali motei na losambo ya Buddha, awa. Mbote na yo, moninga na ngai ya motuya. Pe nasolólá mingi, kasi mingi mpenza te, ná bato ya Buddha; pe mpenza—mpenza na Canada, katikati na ba-Chinois, pe namonaki ete bazali mpenza na bolingo pe boboto.

<sup>12</sup> Nazoyeba lisusu elenge mobali moko ya Buddhiste, ya tempelo ya Buddha, ayaki na liyangani ya Winnipeg, pe azalaki mokufi-miso. Bato ya nzoto mike mpenza, ya boboto mingi, pe na ntembe te bandimaka ete Nzambe azali mobikisi na bokono. Pe wana nazalaki kobondela mpo na ye, azalaki koloba mbala na mbala ndenge alingi Nzambe, pe na mbala moko miso na ye efungwanaki, kati na . . . Pe ezalaki likambo moko ya ki—kitoko mpenza. Boye, to—tosepelaka na bato nyonso pe na moto moko moko.

<sup>13</sup> Sikawa, nazuá naino libaku ya boye te liboso, na Chicago, komeka koteya . . . Kútu, nakomeka ata moke te koteya mateya mosusu, mpo batei oyo bazali awa baleki ngai mosika mpenza, mpo na komema liteya. Kasi, sima na manso, bozali awa te mpo na koyoka liteya. Kasi nakanisaki ete ekozala ntango malamumu mpenza koleka ete nákutana na batei ya Chicago, ya etúká oyo awa, pe koyebana ná bango malamumu koleka, pe tokoyebana malamumu koleka bamoko na bamosusu. Pe natondi mpenza Nkolo mpo na libaku oyo. Mpamba te, nayá na engumba oyo mbala mingi, na lisungi ya lingomba moko mpamba, pe na lisungi ya ba-Hommes d’Affaire Chrétiens; yango wana, nazuaki libaku te ya koloba ngai moko na lisanga ya bandeko.

<sup>14</sup> Na—na bongo nakanisaki, pe ezalaka na makambo mingi oyo elandaka mosala ya koteya lokola oyo, lolenge nyonso ya likambo yango, mpasi mpe bisengo, na lolenge ete mbala mosusu ekómaka pete mpo moto ázuela yango likanisi ya mabe. Boye nalingi kozua mwa miniti oyo ezali kolanda mpo námeke kolimbola pe—pe kotalisa yango polele epai na bandeko na ngai, polele mpenza na ndenge oyo nakoki kosala yango.

<sup>15</sup> Pe na—namikokeli te pe nazangi makoki ya koloba ma—maloba oyo ntango mosusu ekomonana na ntina epai ya bato batángá. Ngai natángá te, pe nazangi yango. Kasi nazalaki . . . nalingaka Nkolo. Pe, mbala mosusu, Nkolo apésá ngai nzela mosusu ya kolóna milimo, na nzela na likabo ya Nzambe, mpo ézipa libulu ya eloko oyo baboti na ngai bazangaki makoki ya kopesa ngai, kotanga. Nauti na libota moko ya babola, ya bana zomi, ná tata moko ya kobela-bela, pe nazuaki libaku ya kotanga te. Na bongo, ntango nabotamaki, likambo moko esalemaki ete . . . kobikela moko ná Nzambe, mpo na mama pe tata na ngai. Pe bosila kotanga lisolo na ngai. Pe, na nzela na yango, nókomeka kosala na ngambo na ngai, elongo ná bino bandeko, mpo na kobenda basumuki epai na Klisto. Pe sikawa ngai . . .

<sup>16</sup> Nazali moto na bindímándima te. Kasi ntango nyonso, liboso ya kofungola Liloba, nalingaka kosolola mwa moke na Mokomi yango. Boye, tokoki lisusu kogumba motó mwa moke.

<sup>17</sup> Tata na biso ya motuya, Yo ozali Nzambe na biso, pe tobelemi epai na Yo na nkombo ya Nsango Malamumu. Ngai oyo liboso ya

bana na Yo, bakengeli na Yo, pe bandeko oyo bazali na kondima ya motuya lokola oyo ya ngai. Pe, motema na ngai etondi na esengo ya koyoka mibali oyo basosolamaki mabe, pe batindaki bango na ba-lopitalo ya bato na maboma, na ntina na Bokonzi na Nzambe; komona ndenge Ozali kobenga bana na Yo na mikolo na suka.

<sup>18</sup> Pe tondimi solo, Tata, ete tozali kobika na suka ya momekano mwa bopoti. Ndenge mosakoli alobaki: “Pole ekozala na ntango na mpokwa.” Pe tondimi lelo ete tozali bamemi ya Pole monene ya Nsango Malamu oyo, na ngolu na Yo, Opesi biso nzela ya komema yango kino na suka ya mokili, epai wapi kolamuka oyo ekeí.

<sup>19</sup> Pe nabondeli, Tata, na ntongo oyo, ete, uta na motema na ngai, Ópesa ngai nzela ya koloba na bandeko na ngai, mposa pe ntina ya bomoi na ngai mpo na Yo, mpo bakoka kososola. Kokisa yango, ete tókoka kozala na bolingo ebongi be, bondeko, pe boyokani, na mosala mobimba ya Nsango Malamu. Mpo tosengi yango na Nkombo na Yesu, Oyo abondelaki ete tózala moko, lokola Ye na Tata na Ye bazalaki Moko. Kondimáká likambo oyo, ete: “Na yango nde bato nyonso bakoyeba ete bozali bayekoli na Ngai, ntango bozali na bolingo, moko mpo na mosusu.” Amen.

<sup>20</sup> Sikawa, kaka . . . Nazali kolikia pe natii motema ete nazali kotungisa bino te, bandeko mibali pe basi, na likambo oyo. Kasi nakanisi nakosepela koloba polele, na lolenge ete bokozala na ntina te ya koyoka te oyo moto mosusu alobi. Pe nalimbólá yango, mbala mingi, na mayangani mosusu ya batei, kasi oyo ezali mbala na ngai ya liboso mpo na etonga ya Chicago, pe nakosepela ete bóyeba ngai malamumpenza, na oyo nazali komeka kosala.

<sup>21</sup> Kati na Nsango Malamu ya kala oyo epambolami, na mokapo ya 26 na Mokanda ya Misala, totangi:

*Na boye, E mokonzi Agilipa, naboyaki kotosa emononeli na likolo te:*

<sup>22</sup> Oyo, na ntembe te, Polo nde azali koloba. Oyo kútu, biso nyonso, lokola batei, tolingaka kozua ye lokola ndakisa, mpamba te ye . . . Bisu, na motema moko, tondimaka ete azalaki ntoma oyo atindamaki na lingomba ya Mabota, ete Nzambe abengaki ye mpo ázala mo—motatoli epai na Mabota. Pe mosala na ye ya koteya, bato batielaki yango ntembe.

<sup>23</sup> Pe na momesano, soki eloko moko oyo ezali libanda na momesano esalemi, esalaka ete tótiela yango ntembe. Ezalaka, pe nakanisi ete ezali na yango bobele sembo; esengeli étielama ntembe. Pe nakanisi ete, mbala na mbala, bakengeli bakebaka mingi na ma—makambo oyo bayokaka, pe nabanzi bazali na ntina ya kozala bongo. Mpamba te, soki nasosoli ndimbola ya liloba oyo *mokengeli*, elingi koloba “mobateli ya mpate.” Pe, yango wana, ye azali mo—mo—moleisi, to mobateli, ya etonga

ya mibali pe basi oyo Molimo Mosantu atii ye sinzili na yango. Pe apesameli makoki ya koyeba lolenge ya bilei oyo ba-mpate na ye bazali kozua, pe esika ezali kouta. Nakanisi ete apesameli makoki na likambo yango.

<sup>24</sup> Pe soki mokengeli, to mbala mosusu bato, bakómaka lokola bazali na mwa bokebi, yango esengelaki, ata moke te, kotungisa moto moko te. Esengelaki bobele kopesa limemia na motema ya moto, mpo na moto oyo kati na bango, oyo azui ngambo wana, oyo akotiela yango ntembe. Pe, sima na nyonso, soki oyebi malamú te ete ozali na molongo, ndenge nini okotikáláká kotambola na kondima?

<sup>25</sup> Soki otii na makanisi na yo. . . Sikawa, yango ezali lokola psikolojí; ekoki pe kozala yango, pe ezali yango, kasi ezali na yango mabe te. Kasi soki mpenza, na motema na yo, soki okanisi ete okotelemáká te na mésa, ekoki pe kosalema ete ótelema te. Omoni? Osengeli. . . Ezali na yango pete ndenge wana.

<sup>26</sup> Osengeli kondima. Osengeli kozala na kondima. Osengeli kotia motema. Pe ndenge nini okoki kotia motema na likambo oyo o—oyo oyebi ata te esika ozali kokende? Ndenge nini nakoki kokumba motuka na nzela oyo natikálá koleka te liboso, na lombangu mingi, ná bisika ya kobaluka ebele, kozanga koyeba eloko nini ebombami na esika ya kobaluka oyo elandi? Osengeli komona epai wapi ozali kokende, soki te okoyeba ndenge ya kotambola te. Pe ezali bongo nde moto nyonso asengeli kozala. Na bongo ntango okoki kosala yango, omoni yango, emonisameli yo, pe oyebi esika oyo ozali kokende, na ntango wana eloko moko te ekopekisa yo.

<sup>27</sup> Pe nakanisi, yango nde likambo oyo ye, Polo, azalaki koluka kosósolisa Agilipa awa. Ete, a—ayebisaki bango ete, “Na kala, nazaláká moko na bino.”

<sup>28</sup> Pe nabanzi, ntango mosusu, soki—soki ndeko mobali mo-Batiste oyo, soki akokaki kokende na lingomba Batiste na ntongo oyo, ye ná mwasi na ye, yango elingaki kozala ntango mosusu litatoli na bango. “Na—nazaláká kala moko na bino.”

<sup>29</sup> To ndeko ya Eglise de Christ, to oyo—oyo ya ba-Campbellite awa, soki akei epai ya—ya bato na ye. Nabanzi ebengami na nkombo moko ya malamú koleka; babengaka yango Bayekoli na Klisto, kasi na bosembo, bandimaka nde mateyo ya Alexander Campbell. Na nsima, Eglise de Christ babimaki kati na bino, na ntina na mizíki. Ya solo, boye te? Pe soki akokaki kozonga epai na bango, alingaki koloba: “Nazaláká na kala moko na bino.”

<sup>30</sup> Pe Polo akendeki kuna, epai ya Mokonzi Agilipa, ná Festus, pe alobaki: “Nazaláká na kala moko na bino. Nazalaki Mofalisai ya Bafalisai.” Ayekolaki na makolo ya Gamaliele, molakisi monene, pe ayebaki mibeko pe mitindo na bango nyonso, ná makambo oyo bango bazalaki kondima ná oyo bazalaki kondima te. Pe alobaki: “Kutu nanyokolaki Lingomba ya Nzambe kino na

kufa.” Bomoni? Alobaki: “Likambo mpenza oyo bazali kotiela ngai ntembe, nazalaki monyokoli na yango.”

<sup>31</sup> Pe nakanisaka ntango nyonso ete liwa ya Etiene etungisaki Polo mingi, mpamba te, na ntango yango amonaki nkembo oyo ezalaki na elongi ya Etiene. Ntango atombolaki miso, wana mabanga ezalaki kobeta ye tée na liwa, pe alobaki: “Namoni Yesu ateleme na loboko ya mobali ya Nzambe.” Pe boyebi, bokoki koboma motindami, kasi bokoki ata moke te koboma nsango na ye. Pe nsango yango, atako Etiene akendeki kokutana na Yesu, ata bongo, nsango na ye ekobaki, mpamba te Polo akobaki kolobela yango, pe, ete, azalaki “moke koleka” kati na bango, kasi abongaki te kobengama moko na bango, mpo azalaki nzénénéké pe—pe apesaki ndingisa na ye mpo na koboma mosantu oyo.

<sup>32</sup> Pe yango wana, Polo, ndenge bato nyonso basengelaki kosala liboso na bato, Polo akamati ko—kobikela na ye, longwa na ebandeli, na oyo ye azalaki; na nsima atii yango pe atongi yango likolo na Makomi, mpo na kotalisa ete makambo oyo azalaki kosala elongobanaki na Makomi. Atako ekesanaki na oyo bango bazalaki kondima, kasi azalaki kolakisa bango ete ezalaki Likomi.

<sup>33</sup> Na yango, nakanisi ete biso...Eloko nyonso, ndenge nalobaka mbala mingi, bandeko, bino baoyo bosilá kozala na mayangani, ete, soki botikálá komona ngai koloba makambo oyo elongobani na Makomi te, na ntango wana nakanisi ezali solo ete...to ndeko mosusu nyonso, tosengeli koya moko epai na mosusu pe koloba: “Likambo wana ezali kati na Biblia te,” bomoni. Soki ezali kati na Biblia, okoki kozala na ndimbola oyo ekeseni; kasi, ezali, soki ezali kati na Makomi, malamumu.

<sup>34</sup> Sikawa, Polo azalaki kopesa ndimbola na ye ya makambo oyo mosakoli alobáká, oyo Mose alobáká, oyo ezalaki kokokisama. Pe akutanaki na Yesu na nzela, kati na emononeli. Pe Yesu yango abengaki ye.

<sup>35</sup> Kutu, yango esengelaki te kozala likambo moko ya makasi mpo na Bayuda wana, ndenge alobaki: “Moto na lokumu Festus,” pe—pe bongo na bongo, ete e...“ekoki kozala likambo ya kokamwa mpo na yo, ete Nzambe akosekwisa bakufi?” Bomoni? “Mpamba te, soki oyebi oyo Nzambe azaláká kuna kala, na nzela na—na Makomi, na ntembe te, olingaki koyeba ete Azali na makoki ya kosekwisa bakufi.”

<sup>36</sup> Na nsima alobaki, alakisaki bango likambo abikelaki na nzela ya Damaseke, oyo esalemaki, ete, mpo na koyebisa bango ete Yesu oyo—oyo bango bazalaki kosalela mobulu mingi mpenza, ndenge ye azalaki likambo Yango, azalaki mpenza Nzambe, oyo bango bazalaki kosalela ntango nyonso. Mpamba te, Azalaki na esobe elongo na bango, Ye nde akambaki bango, lokola Pole wana; Móto, Likonzi ya Móto oyo ekambaki bango.

Pe Amonanaki na Polo na lolenge yango moko, Pole yango lisusu, oyo ebomaki ye miso. Pe atunaki: “Yo Nani, Nkolo?”

<sup>37</sup> Pe Alobaki: “Ngai Yesu, oyo ozali konyokola. Pe ekozala na yo mpasi kotuta makolo na makonga.”

<sup>38</sup> Pe azalaki komeka kolimbolela bango nini likambo yango ezalaki, pe—pe azalaki koluka kolakisa bango yango, likambo oyo azalaki kotalisa na bato, ezalaki, ete: “Yesu Klisto azalaki Masiya,” pe ete “Akufaki, pe Nzambe asekwisaki Ye.” Pe yango ekokanaki na Makomi. Ete, “Sikawa Amataki Likolo, epai na Nzambe Tata,” pe ete—ete ye azalaki motatoli ya lisekwa na Ye. Pe, ete bikamwiseli, ná bilembo, ná bikamwa oyo, oyo ezalaki likambo moko ya ndéngé liboso na bato, ezalaki na yango makambo ya sika te mpo na mondimi ya solosolo ya Makomi, mpo Biblia elobelá yango.

<sup>39</sup> Bótala sima na basakoli, ndenge yango esakolaki, makambo, oyo, na boyei ya Masiya, pe makambo oyo Ye akosala: “Motengumi akopumbwa lokola mboloko,” na Yisaya 35 ná Makomi ndenge na ndenge oyo akokaki kolobela. Tokomi yango awa te, kasi ntango mosusu azalaki kozongela yango pe kolobela yango na maloba moke na ye liboso ya bakonzi; mpo, ntango mosusu bazalaki na motema molai te epai na ye lokola bino bozali na yango ná ngai. Bongo, na nsima a—azalaki kolimbola yango, pe komeka koyebisa bango ete Nzambe moko oyo bazalaki kosalela . . .

<sup>40</sup> Na bongo, lisusu, alobaki: “Na lolenge oyo ezali kolangama *lipengwa*,” elingi koloba “liboma,” bomoni. “Lolenge oyo ebiangami lipengwa, na lolenge wana nde ngai nasambelaka Nzambe oyo bino bosambelaka.” Bomoni, “Na lolenge oyo ebiangami lipengwa.”

<sup>41</sup> Nayebi mpenza malamau ete, lelo, soki totelemi ná mangomba ya kala oyo epai tozaláká kosambela, lokola ba-Presbiterien, ba-Katoliko, ba-Batiste, ná baoyo mosusu ya ndenge na ndenge, tokoki kopesa litatoli yango moko epai na bato oyo balobi ete balingi, lokola, kotinda ndeko mbali oyo na lopitalo ya bato na liboma, to esika moko ya ndenge wana. “Na lolenge oyo ebiangami lipengwa, lolenge wana nde ngai nasambelaka Nzambe ya bankoko na biso.”

<sup>42</sup> Pe oyo ezalaki mpenza litatoli moko monene liboso na Agilipa, na lolenge ete ata ntango azalaki koloba, Agilipa agangaki, pe alobaki: “Polo, Saulo, na ntango moke okomi pene óndimisa ngai náková Moklisto.” Bomoni, ndenge, ateyaki Makomi polele mpenza, atako ekesanaki na eyanganelo na ye moko. Kasi Makomi yango ezalaki mpenza polele be, na lolenge ete alobaki: “Na mwa ntango moke okondimisa ngai náková lokola yo.”

<sup>43</sup> Polo alobaki: “Nakosepela ete bókoma bongo, bino nionso, bobele nakolinga te ete bózala na minyololo oyo ngai nazali

na yango,” bomoni, kasi kozala mondimi lokola ye. Na elobeli mosusu, soki ngai. . . “Nakosepela ete Nzambe ásala ete ómona emoniseli ndenge—ndenge ngai namoni yango.” Na elobeli mosusu, “Na—nakosepela mpenza ete ókoka kosala yango.” Bomoni? “Nakosepela mingi ete ósala yango.”

<sup>44</sup> Ntango Festus, nabanzi, alobaki na ye ete “atangaki mingi mpenza,” ete azalaki “na mobulu na motó na ye.” Kasi ayebisaki ye ete e—ete azalaki bongo te; ete a—ayebaki esika nini ye atelemaki.

<sup>45</sup> Pe nakolinga koloba boye, na ntongo oyo, bandeko. Nakosepela na nyonso mpenza ete nákoka. . . Mpo na komikokanisa na bomoi ya Polo te, kasi bobele mpo na kotia mwa mobóko na oyo elobami. Mpamba te, bato mosusu mingi bazali awa oyo, ntango mosusu, bakoloba na ntongo oyo, kasi nalingaki kozua libaku oyo mpo náloba likambo oyo. Sikawa, nakosepela ete lingomba moko na moko, ndenge nayokaki bino kotanga yango, Tempelo ya Bethel, ba-Independant, ba-Assemblée de Dieu, ná bamosusu. . . Nakosepela ete bino nyonso bókoka komona mpenza oyo ngai namonaka; ete bókoka komona. Nakosepela bókoka komona emononeli oyo ngai namonaka, bongo nde bokozala na lisosoli polele koleka, na lotómo.

<sup>46</sup> Ntango nalongwaki na lingomba Batiste, mpo náya na pantekote; pe Dr. Roy E. Davis, oyo abulisaki ngai na église Missionnaire Batiste, alobaki na ngai ete nalotaki nde ndoto ya mabe, ntango emononeli na Nkolo eyaki pe—pe asololaki na ngai. Pe—pe boyebi oyo lobiko na nzoto ezalaki na eleko wana, ezalaki na nse mpenza.

<sup>47</sup> Pe—pe nayebaki eloko moko te na ntina na ba-Pantekotiste. Nayokáká ete bazalaki etonga ya batúntuki oyo balálaka na nse pe batangaka nsoi lokola ba-mbwa ya liboma, pe basengelaki kopepa bango mopepe mpo na kozongisela bango mpéma, ná makambo nyonso ya ndenge wana. Yango nde nyonso oyo ngai nayebaki na ntina na ba-Pantekotiste.

Alobaki: “Nani yango yo okanisi akoyoka yo?”

<sup>48</sup> Nalobaki: “Soki Nzambe azali kotinda ngai, boye ezali na esika moko pe na moto moko oyo Ye azali kotinda ngai.” Ya solo. Bomoni? “Mpamba te,” nalobaki: “Dr. Davis,” nalobaki, “Azalaki mpenza wana; natelemaki wana pe nazalaki kotala Ye,” nalobaki bongo. Balobaki na ngai ete bimononeli wana. . .

<sup>49</sup> Ngai nazali mondimi monene, bandeko, ete—ete makabo pe kolangama ekobotolama te. Na—nandimaka yango. Obotámá, okoki kozala te eloko oyo yo ozali te. Pe soki omeki komikómisa eloko oyo yo ozali te, ozali bobele kosala mosala ya moto na bilongi mibale. Pe Nzambe tika ngai nákuza liboso nákóma moto na bilongi mibale, bomoni. Tika ete názala bobele oyo ngai nazali, na nsima nde násosolisa yango malamau. Pe—pe, na nsima,



tika—tika názala ndenge wana, bongo nde moto nyonso akoyeba. Na ntango wana bokoyeba malamau mpenza.

<sup>50</sup> Bongo sikawa, ndenge boyebi, ngai natángá mingi te, ndenge nalobaki. Boye na . . . na oyo etali likindo, nayebi eloko moko te mpenza. Pe nabanzi ete boyebi yango, bomoni. Pe lokola motei, ezali mpasi mpo namibenga mpenza bongo, mpo natángá kelasi te pe nayebi maloba te, pe bongo na bongo. Kasi moke oyo nazali na yango, na . . . ná boyebi na ngai, na ngolu na Ye, ya koyeba Nkolo Yesu, namekaka kokabola yango ná bandeko na ngai nyonso, na bisika nyonso, kokabola yango.

<sup>51</sup> Pe, kasi, ntango nalongwaki na lingomba Batiste . . . yango nde lingomba bobele moko, oyo nakótá, to oyo nabilisamaki kati na yango. Pe nabilisamaki na mobu 1933, na lingomba Missionnaire Batiste, na Jeffersonville, Indiana. Ezali mo—mo . . . ezali moko na mangomba ya Likita ya ba-Batiste ya Súdi. Boye biso, na ngonga oyo, ngai . . . ntango nabimaki pe na . . .

<sup>52</sup> Sikawa, lingomba Batiste ezali lingomba ya bonsomi. Bisobiso nyonso toyebi yango, ete ezali—ezali . . . Okoki koteya pene na nyonso oyo olingi, soki losambo na yo bandimi yango. Bango . . . Okoki koteya nyonso oyo olingi.

<sup>53</sup> Pe ngai nalingaka bongo, bomoni, mpo nandimi ete elongobani na bantoma. Mpamba te, motó, molongó ya likolo kati na lingomba, ezali nde mobатели, tososoli yango, mokengeli. Pe—pe soki mo—mo . . . Soki eveke to moto mosusu alingi kolongola emoniseli oyo mokengeli azali na yango, boye ndenge nini Nzambe akosala lisusu kati na lingomba na ye? Bomoni, okoki mpenza kososola yango te. Boye, nazali pe na . . .

<sup>54</sup> Ntango nalongwaki kuna, nakutanaki na etonga ya liboso, oyo ezalaki lobiko na nzoto ya elenge Betty Daugherty, na St. Louis, na Missouri. Ezalaki lingomba ya ba-Pantekotiste Unie, to église Pentecotiste du Nom de Jésus, mokengeli yango azalaki kosambela kuna, pe mwana na ye ya mwasi abikisamaki na nzoto. Na bosomebo, nakanisaki ete yango nde esalaki ete ázala pantekotiste, mpo bazalaki komibenga ba “Jesus Seul.” Pe nakanisaki ete yango nde esalaki ete bázala ba-pantekotiste, mpo ezalaki bongo nde bazalaki komibenga bango moko, pe yango nde ezalaki bokeseni. Bongo, ee, nde kolongwa wana nakendeke na . . .

<sup>55</sup> Pe mobali moko malamau; tozalaki na liyangani moko ya monene na St. Louis, fotó na yango ezali na kati kuna. Tozuaki Auditorium ya Kiel; pe na mpokwa ya liboso, to ya mibale, bato nkoto zomi na minei batondisaki yango mpenza, pe tokokaki ata te . . . toselgelaki kotia ba-police pambeni na bikuke, mpo bato bákoba kokota te.

<sup>56</sup> Pe kolongwa wana, nakobaki kino epai ya Richard T. Reed, ya Tabernacle ya Bon Vieux Temps ya Biblia, na Jonesboro, oyo yango pe ezalaki ya ebongiseli moko yango. Pe kolongwa wana,

kino epai ya Docteur G. H. Brown, ya ebongiseli moko, na 505, Balabala Victor na Little Rock, Arkansas. Pe, kolongwa wana, kino na Côte Ouest.

<sup>57</sup> Na nsima, ntango nakómaki na Côte Ouest, nakutanaki na kokoso. Nde nasosolaki ete bokabwani ezalaki mingi kati na bapantekotiste, kati na bibongiseli na bango, lokola kati na biso ba-Batiste. Bomoni, bokeseni ezalaki—ezalaki mingi mpenza, ezalaki, bazalaki na bokeseni ndenge na ndenge. Ezalaki na ba-Assemblée de Dieu, ba-Eglise de Dieu, ná baoyo mosusu, ná baoyo mosusu, ná baoyo mosusu, pe—pe bokeseni yango. Bakabwanaki kati na bango, pe batiaki ba-ndelo mike mike. Pe bandeko mosusu nyonso babandaki koya epai na ngai, koyebisa ngai: “Oh, ozali moto ya Jesus Seul, ná etonga oyo kuna.”

Nalobaki: “Te, ngai—ngai namibengaka bongo te.” Bomoni?

Alobaki: “Kasi, osanganaka ná bango.”

<sup>58</sup> Nalobaki: “Ee, yango—yango ekómisi ngai moko na bango te.” Bomoni? Pe nalobaki: “Na—na—na bobele... Bazalaki bandeko.”

<sup>59</sup> Pe alobaki: “Oh, bazali etonga ya... Oh, bazali na eloko mosusu te bobele bitape epai bingondó bakitaka pe nyonso wana, kuna, ndenge wana. Esika...”

<sup>60</sup> Nalobaki: “Sikawa, limbisa ngai. Nakutanaka na bato malamuni mpenza kuna. Pe bazali bato na Nzambe.” Pe nalobaki: “Na—nakondima ata moke te ete bábenga bango bato mabe; mpo bazali mabe te.”

<sup>61</sup> Ee, bongo namekaki kotia yango mosika na ntango nyonso ngai nakokaki, kozanga kolobela ngámbo moko to mosusu. Boye, nabandaki koyekola soki makanisi na bango ezalaki nini, bokabwani na bango ezalaki nini, pe eloko nini esalaki ete bákabwana. Pe nayaki komona ete bitonga minene ezalaki mibale kati na bango, moko na yango, babengamaki Jesus Seul, pe oyo mosusu babengamaki ba-Assemblée de Dieu. Pe babimisamaki, to bakabwanaki, mpo na likambo ya libatizi na máí; bamoko bazalaki kosalela “Tata, Mwana, Molimo Mosantu,” pe bamosusu bazalaki kosalela Nkombo ya “Yesu”.

<sup>62</sup> Ee, natalaki, pe na ngámbo nyonso mibale ezalaki na bato minene, basali na Nzambe. Pe nakanisaki: “E Nzambe, soki nakokaki komona bango nyonso kokóma na... kokende bobele liboso pe kosala... kasi bátia ba-ndelo te, mpo na koloba: “Tokoyokana te bamoko na bamosusu.” Kasi namonaki, na likambo yango, ete molimo mabe esilaki kokota kati na bango pe ebotaki koyina pe mayele mabe, na makambo oyo esilaki kokóma katikati na bango. Namilobelaki: “Wana ezali mpenza ndenge zabolo alingaka. Yango nde oyo ye alingaka.” Na ntango nyonso oyo bozali kotalisana mandóki bamoko na bamosusu, ye akobunda na ye ata moke te. Pe ngai... .

63 Na boye, sukasuka, ntango ya momekano ekomaki. Pe momekano yango ezalaki na engumba Seattle, na Washington, pene na mobu 1946. Pe mokolo moko na ntongo, bamemaki ngai na reception ya hotel, esika moko lokola oyo, mpo na—mpo na bilei ya ntongo elongo ná mwa batei. Pe esengelaki násolola na bakambi mibale.

64 Pe moko na bango ezalaki Dr. Ness. Nabanzi ete bino bandeko ya ba-Assemblée de Dieu boyebi ye lisusu. Azalaki kofanda na ngambo ya nord-west ya ekolo; moto monene, ya mayele, atángá mingi. Ye azalaki ntoma ya ba-Assemblée de Dieu.

65 Na nsima, Dr. Scism, ya église Pentecotiste Unie. Nabanzi ete bino bandeko ya ba-Pantekotiste Unis, boyebi ye lisusu. Ye pe azalaki kofanda na ngambo ya nord-west ya ekolo kuna, azalaki mokonzi na bango, pe ya bitúká kuna.

66 Boye, mibali mibale oyo bakutanaki. Pe esengelaki bamema ngai liboso na bango, mpo ko—kobendana ebandaki kokóma makasi, pe bakómaki kobundisa ngai na ngambo nyonso. Pe namilobelaki: “Nasengeli kosala nini? Nakoki kosala nini?”

67 Sikawa, ee, bazalaki koloba: “Ee, yo osengeli kozua ngámbo ya moko to ya mosusu. Soki olingi kotambola elongo na bato ya Nom de Jesus, osengeli kozala moto ya Nom de Jesus. Pe soki otamboli elongo na ba-Assemblée de Dieu, osengeli kotika bato ya Nom de Jesus, pe kozala moto ya ba-Assemblée de Dieu, to bongo na bongo.” Ekómaki na esika moko oyo nasengelaki kotalisa likanisi na ngai.

68 Nabondelaki mingi na ntongo wana liboso ya kokende kuna. Nalobaki: “Nzambe, sunga ngai. Mpamba te, bato minene mibale bazali kuna; basali nkoto na nkoto bazali kuna. Pe Yo otíndi ngai awa na mosala ya koteya. Pe bango mibale bazali basali na Yo. Pe esengeli na ngai kopesa mwa lisungi oyo nazali na yango na ebongiseli moko, na ntango oyo ezali kobundisa oyo mosusu?” Bomoni? “Na—nazokoka komiyoka malamu te kosala bongo. Nandimi te ete ekozala mokano na Klisto ete násala bongo.” Pe nalobaki: “Nzambe, sunga ngai pe pesa ngai eloko ya kosala, to pesa ngai eloko ya koloba.”

69 Pe, nazalaki na moto moko te. Nasengelaki bobele kotelema wana, kaka Nkolo Yesu ná ngai, na ntongo wana.

70 Ee, kowelana monene ebandaki. “Okosala nini? Mokano nini—nini—nini okozua?”

71 Nalobaki: “Mokano na ngai esilaki kozuama. Bongo, mokano na ngai, ezali ya kotelema na katikati na bino mibale, pe kokota na ebongiseli moko te; pe wana nazingi bino nyonso mibale na maboko na ngai, nalobi: “Tozali bandeko.” Bomoni? Bomoni, tozali bandeko. Bomoni? Pe nalobaki: “Namekaki kotanga babuku nyonso oyo nakokaki kotanga, ndenge likambo yango ebandaki, oyo bazalaki kobenga ‘likambo ya sika,’ pe ndenge

bakabwanaki, pe ndenge *songolo* abandaki likambo oyo boye pe likambo oyo wana boye.” Pe nalobaki: “Kowelana oyo ezali kati na bino,” nalobaki, “nde eloko moko oyo ekabolaki bapantekotiste, na mokolo ya . . . nsima na Pantekote. Babandaki kowelana bango na bango.” Pe nalobaki: “Likambo yango ezali kokabola lisusu.”

<sup>72</sup> Nalobaki: “Nzela ekoki kozala, ete esika moko ya boyokani ézala kati na bino, bino bandeko? Ezali na eloko moko, oyo—oyo ekoki kosimba?”

<sup>73</sup> Ee, balingaki kofungola monoko na ntina na yango te, mpo ezalaki mpenza maloba makasi. Boyebi, eleki pene na mibu zomi na mitano to ntuku mibale, ndenge esalemaki, mpo etonga moko eutaki kokabwana na oyo mosusu, pe kobendana ezalaki makasi.

<sup>74</sup> Boye nalobaki: “Ee, bandeko, Likambo nakosala yango oyo. Nakokende ko . . . Nzambe atíndá ngai mpo na kobatisa te, ata bongo. Atíndá ngai mpo na kobondela mpo na bana na Ye oyo bazali kobela.” Nalobaki: “Na bongo, ngai nako—nakobondela mpo na bana oyo bazali kobela, pe bino batei, bokobatisa bino moko,” nalobaki bongo.

<sup>75</sup> Nalobaki: “Sikawa, nalingi kotuna bino likambo moko, mpo bósosola.” Nalobaki: “Ndeko Ness, ba . . . bato ya Nom de Jesus oyo, ondimi ete bazuaki Molimo Mosantu ntango balobaka minoko na sika pe basalaka makambo ndenge moko oyo bino bosalaka na ba-Assemblée de Dieu?”

Alobaki: “Na ntembe te.”

<sup>76</sup> Nalobaki: “Ndeko Scism, ondimi ete bato ya ba-Assemblée de Dieu bazali na Molimo Mosantu ntango balobaka minoko na sika pe basalaka makambo ndenge bino bosalaka sima na libatisi?”

Alobaki: “Ya solo, nandimi yango.”

<sup>77</sup> Nalobaki: “Sikawa, Biblia elobaki: ‘Nzambe apesaka Molimo Mosantu na baoyo batosaka Ye.’ Sikawa, nani atosaki Ye? Nani atosaki Ye? Nani kati na bino atosaki Ye? Pe Nzambe apesi na bino mibale Molimo Mosantu, bomoni.”

<sup>78</sup> Nalobaki: “Ndeko Scism, okoki koloba ete Ndeko Ness azali na Molimo Mosantu te?”

Alobaki: “Te.”

<sup>79</sup> Nalobaki: “Okoki koloba ete Ndeko Scism azali na Molimo Mosantu te?”

<sup>80</sup> “Te.” Bomoni? Boye, bango mibale bazalaki kondima ete moninga azali na Molimo Mosantu.

<sup>81</sup> Kasi, bomoni, ezali na yango likambo te, bandeko. Ezali na yango likambo te. Pe nayokaki, nsima na mwa ntango ete . . .

Nakozongela likambo na ngai na mwa miniti.

<sup>82</sup> Bandeko ya Finlande oyo awa, nsima na ngai kolongwa na Finlande; epai wapi Nzambe apesaki biso, ndenge nakanisaki, moko na mayangani na biso ya minene koleka. Epai wapi elenge mobali oyo akufaki asekwaki, ná makambo mingi. Na Stockholm, na Suède, nakutanaki ná Lewi Pethrus ya lingomba Filadelfia kuna, azali moto monene ya Nzambe, ná lingomba Filadelfia. Ndeko Gordon Lindsay, oyo azalaki, sikawa . . . nakanisi. Nandimi te ete azali mondimi na yango sikawa, kasi azalaki mondimi ya ba-Assemblée de Dieu.

<sup>83</sup> Pe ba-Assemblée de Dieu bazali moko na baléndisi minene ya mayangani na ngai, na mokili mobimba. Ná bato ya Foursquare, oyo baútá na ba-Assemblée de Dieu, bazali moko na baléndisi minene na ngai. Ba-Unitaire bazali, na mokili mobimba, bazali moko na baléndisi minene na ngai. Bomoni? Pe natelemaki na mokano wana, bobele mpo na kosilisa mindondo, na bongo natelemaki na mokano, ete nakozua ngámbo moko te kati na kowelana wana. Kino ntango tokomona ete tozali bandeko, pe tokosangana, bongo nde biso—bisó nyonso tokomona likambo yango moko mpenza, epai, tozali kokóma, mposa pe ntina oyo tozali kosala bongo.

<sup>84</sup> Pe o—osengeli liboso komeka mposa pe ntina ozali kolanda. Liboso, luka mokano na Nzambe; na nsima luka koyeba ntina ozali kolanda; na nsima meka mposa na yo pe tala soki mposa na yo ezali malamú. Na ntango wana, ndenge Yesu alobaki na Malako 11:24: “Soki olobi na ngomba oyo ete, ‘longwa wana,’ pe otii ntembe na motema na yo te.” Kasi na ntango nyonso oyo ezali na ntembe na motema, ya koyeba soki ezali mokano na Nzambe to te, to soki mposa na yo to ntina ozali kolanda ezali mabe, ekolongwa ndenge nini? Kasi soki oyebi ete mposa na yo ezali malamú, pe ezali mokano na Nzambe, pe ntina oyo ozali kolanda ezali malamú, yango esengeli kolongwa. Esili, soki te, Nzambe alobaki likambo moko ya lokuta.

<sup>85</sup> Yango nde ntina mpenza, ntango namataka na etumbelo, na ba-ndakonzambe, moto moko te ayóká ngai kolobela makambo yango na etumbelo, makambo wana. Natikaka yango kimia. Bomoni, wana etali nde bino, bandeko mibali. Bomoni? Ngai nazali awa mpo na kosunga bino ete bómema milimo epai na Klisto, na nzela na likabo na Nzambe, bomoni. Bomoni? Yango ezosala bokeseni moko te . . . Bino moko bópezesa libatizi na bino. Kasi boye na oyo etali . . .

<sup>86</sup> Ya solo, babéngá ngai nkombo nyonso. Babéngá ngai, nayebi te boni, nyonso, kobanda na—na “mwana na Nzambe oyo alati nzoto” kino na—na “zabolo.” Ya solo, nyonso. Kasi, na suka ya nyonso wana, nazali ndeko na bino, mwana mboka ya Bokonzi na Nzambe; nazali kosala elongo na bino nyonso, mpo na Bokonzi. Pe ezali ya solo.

<sup>87</sup> Sikawa nako, soki ezali mabe te, pe soki bomoni ete tozali na ntango ya kokoka, nakosepela koyebisa bino ndenge tosololaki likambo yango. Ekozala na yango mabe te, bandeko, mpo na miniti moko? [Batei balobi: “Koba na yo. Iyo.”—N.D.E.] Ndeko, Ndeko Ness ná bamosusu. . . Malamu. Pe ekoki kozala mwa eloko oyo ekoki kosunga bino. Ekosunga bino mpo bósosola, mwa moke.

<sup>88</sup> Nakomáki na lokasa oyo, mwa makambo oyo nayebi lisusu ete bazuaki wana. Na bongo, batunaki ngai, eloko nini ngai nazalaki kondima na oyo etali “bosato bosantu,” soki nandimaka ete “bosato bosantu” ya Nzambe ezalaka?

<sup>89</sup> Sikawa, bandeko, ntango tokolobela likambo oyo, nákolikia ete ntango yango ekosila, tokozala kaka bandeko moko ndenge tozalaka bandá kala. Bomoni? Kasi namoni ete nasengeli koyebisa bino yango, mpo bato na bino bayáka na mayangani na ngai, pe ya solo mpenza, nakolinga te moko na bango ázonga, na motema esepeli te.

<sup>90</sup> Pe nalobaka ntango nyonso na bato oyo batunaka ngai mituna, libanda na oyo nateyaka na etumbelo. . . Pe sekretère na ngai ye oyo, pe nyonso. Soki batuni ngai motuna: “Boni mpo na likambo *oyo*, to boni mpo na likambo *oyo wana*?”

<sup>91</sup> Nalobaki: “Bótuna mokengeli na bino, bomoni. Mpamba te, soki ye asili kokamba yo kino awa, pe ozui Molimo Mosantu, akokoba pe kotambwisa yo, omoni. Yo, bomoni, bótuna nde mokengeli na bino.” Mpamba te, makambo ya mike mike ndenge wana etiaka mobulu, pe yango wana naticalaka mosika na yango, bomoni.

<sup>92</sup> Sikawa, pe balobá na ngai ete nazalaka mo—mobundisi ya bibongiseli. Kasi, ngai nazali bongo te. Nakanisi ete bibongiseli ezali malamumu mingi, kasi na ntango lolenge ya kotambwisa makambo na bino ya ebongiseli na bino ebebaka, nde eloko wana nde ngai natelemelaka. Bomoni? Ata soki ezali bomoko, to—to ezali bosato, to eloko nini, lolenge ya kotambwisa makambo; ntango bokómi na esika oyo, bino. . . pe bolobi: “Biso tozali ba-Assemblée de Dieu.”

“Ee, banani wana, na ngámbo ya balabala?”

<sup>93</sup> “Oh, ezali bandeko na biso. Ba—babengaka bango ba-Pantekotiste Unis.”

“Ee, baoyo kuna nde banani?”

<sup>94</sup> “Oh, ezali bandeko ya Foursquare. Oh, tozali bandeko malamumu mpenza. Tozali na boyokani makasi, kati na biso.”

“Oh, bino nyonso bondimaka eloko moko?”

“Oh, iyo, tondimaka bongo.”

“Bongo, kasi, eloko nini esali ete bókóma boye?”

<sup>95</sup> “Ee, bandeko *oyo* babatisaka *boye*. Pe *baoyo* babatisaka *boye*, bapesi biso mokongo. Pe *baoyo* babatisaka . . .”

<sup>96</sup> Lokola kuna na Afrika ya Súdi, ndeko, tokutanaki na likambo yango. Batunaki ngai. Etonga moko, babatisaka mbala misato, kozindisa na liboso. Pe *oyo* mosusu bazalaki kobatisa mbala misato, kozindisa na nsima. Pe balobaki. . . Nalobaki: “Bozuaka yango wapi?”

<sup>97</sup> Moko alobaki: “Ntango Akufaki, Biblia elobi ete agumbaki motó na liboso,” pe alobaki, “yango wana tosengeli kozindisa bango na liboso.”

<sup>98</sup> Pe nalobaki: “Ee,” mpo na etonga mosusu, “nini. . . Bongo bino?”

Alobaki: “Basilá kokunda moto elongi etálá na nse?”

<sup>99</sup> Ee, pe boyebi nini? Bakabwani pe basali bitonga mibale, bibongiseli mibale. Oh, mawa, bandeko! Yango nde likambo *oyo* moyini alingaka. Yango nde likambo alingaka. Iyo. Bino moko. . .

<sup>100</sup> Sikawa, bomoni, ezali Mission ya Foi Apostolique te, to—to ezali moko to mosusu ya ba-Assemblees Pentecotiste, na ngambo mosusu. Ezali yango te. Bato malamau bazali na bitonga nyonso mibale, lokola bazali pe awa. Kasi, bomoni, ezali nde lolenge ya kotambuusa likambo yango.

<sup>101</sup> Ezali kaka lokola Mo-katoliko, ndenge nalobaka mbala na mbala. Soki ye azali Mo-katoliko, kasi azali kotalela Klisto mpo na lobiko, abikisami. Na ntembe te, ya solo. Soki ataleli lingomba, abungi. Pe bandeko nyonso kati na bino ba-pantekotiste bayebi, ete soki tozali kotalela lingomba Pantekotiste mpo ébikisa biso, “tozali, kati na bato, *baoyo* ya mawa koleka,” ya solo, mpo tobungi. Ya solo.

<sup>102</sup> Kasi soki tozali kotalela Yesu Klisto, *boye* tobikisami, “na kondima na yo,” (nde, nini?) ezali mosala *oyo* esili. Kasi makambo mike-mike *oyo*, ya bankombo, yango esalaka bokeseni mpenza te.

<sup>103</sup> Bongo, nalobaki na Ndeko Scism, na. . . pe Ndeko Ness: “Mpo na koyanola motuna na yo,” nalobaki, “sikawa, nazui ngámbo ya moko na bino te bandeko. Pe nayebi ete, na ntango nyonso *oyo* bozali kowelana, bino mibale bozali na libunga. Bomoni? Mpamba te, malamau názala na libunga na mateyo na ngai, kasi sembo na motema na ngai, na esika ya kozala sembo na mateyo na ngai, kasi na libunga na motema na ngai.” Bomoni? Nalobaki: “Na nyonso wana, etali nde lolenge ya motema na yo.”

<sup>104</sup> Pe nakomisa yango lolenge na ngai ya kosala makambo, ya koyeba likambo *oyo*: ete, soki moto, etali te eloko nini ye asalaka, pe bokeseni boni azali na yango, pe eloko nini ye alobaka na ntina na ngai; soki na motema na ngai, kaka lokola lotómo te, kasi uta na motema na ngai, soki nakoki te kolinga moto yango

ndenge nalingaka moto mosusu nyonso, boye nayebi ete mbeba moko ezali awa na kati, bomoni. Ya solo, mpamba te, ezali—ezali. . . etali te soki ye. . .

<sup>105</sup> Mwa ndeko mobali moko ayaki, eumeli te, mwa ndeko moko ya Eglise de Christ. Pe, oh, atelemaki wana, pe alobaki: “Mobali oyo azali zabolo.” Bomoni? Alobaki: “Azoloba na ntina na Molimo Mosantu.” Alobaki: “Eloko ya ndenge wana ezalaka te. Bango, ee, bobele bantoma zomi na mibale nde bazuaki Molimo Mosantu. Pe—pe lobiko na nzoto kouta na Nzambe epesamaki bobele na bantoma yango zomi na mibale.” Pe akobaki koloba, pene na miniti ntuku misato.

<sup>106</sup> Pe nalobaki: “Zela mwa moke, ndeko. Nakanisi ete osengelaki kopesa ngai libaku ya kolobela Yango, omoni.” Nalobaki: “Olobaki ete olobaka esika Biblia elobi, pe ofandaka kimia esika Yango efandi kimia.”

Pe alobaki: “Tosalaka bongo.”

<sup>107</sup> Nalobaki: “Sikawa, olobaki bobele bantoma zomi na mibale nde bazuaki Molimo Mosantu. Biblia elobi: ‘Bato bazalaki nkama moko na ntuku mibale kati na ndako ya likolo ntango Molimo Mosantu akitaki, basi pe nyonso.’ Pe okolinga koyebisa ngai, okanisi ete Polo azalaki na Molimo Mosantu te? Pe ye azuaki Yango ntango molai nsima na wana, omoni. Kasi olobaki: ‘Likabo ya lobiko na nzoto kouta na Nzambe epesamaki bobele na bantoma zomi na mibale.’ Pe Etienne akendeki, nsima na mwa mikolo, kasi azalaki moko na zomi na mibale te. Azalaki ata motei te. Azalaki mosungi, akendeki na Samalia pe abenganaki milimo mabe.” Pe nalobaki: “Oh, ndeko!” Kimia mpenza ekotaki wana, iyo, na esika oyo bosengelaki kofanda kimia.

<sup>108</sup> Pe na nsima, ntango esilaki: “Kasi,” nalobaki, “nalimbisi yo ndenge obengaki ngai zabolo, mpo nayebi ete olingaki koloba bongo te.”

<sup>109</sup> Bongo, ntango asilisaki, ayaki epai na ngai. Alobaki: “Ezali na likambo moko oyo nakoki koloba. Ozali na Molimo na Klisto.”

<sup>110</sup> Nalobaki: “Sikawa, ndeko, nazali ya nani, molimo mabe to ya Klisto?” Bomoni? Bomoni?

<sup>111</sup> Kasi nalobi na bino, bomoni, ezali mpo moto yango, akokaki komona ete nalingi ye; etalaki te soko, azalaki kondima te, pe kondima mpenza ata moke te pe kobundisa ngai. Ye. . .

<sup>112</sup> Ngai nazalaka mói-bokila, ya banyama ya zámba, bomoi na ngai mobimba. Pe bato balobá: “Ndenge nini. . .” Mbala wana oyo nasengelaki koboma ngombolo wana, ná mbeli, bomoni. Balobaki: “Ozalaki kobanga ye te?”

<sup>113</sup> Nalobaki: “Te. Soki nábangaka ye, alingaki koboma ngai, bomoni.”



114 Kasi, omoni, okoki te—okoki kokosa bango te. Bayebaka soki ozali kobanga bango, to te. Soki obangi mpunda, okomona oyo mpunda akosala, akoniata-niata yo. Omoni? Boye soki obangi. . . Okoki kokosa likambo yango te. Osengeli mpenza kozala na yango.

Ezalaka pe ndenge wana ná Satana.

115 Ezalaka pe ndenge wana kati na bato. Osengeli kolinga bato. Okoki na yo kokosa te. Osengeli nde kozala na eloko yango, soki te lolenge na yo ekoyebana na esika moko boye, omoni. Ya solo. Osengeli mpenza kolinga bato, pe bayebi ete olingi bango. Omoni, ezalaka na eloko moko ná likambo yango.

116 Bongo mobali yango, abengaki mwasi na ngai, eleki mwa mikolo, pe alobaki: “Ndeko Branham azali?”

Alobaki: “Te.”

117 Alobaki: “Ee, nazali na likambo moko, oyo nasengeli koloba. Nayokanaki na ye te, na oyo etali likindo, kasi nalobi azali mosali na Klisto.”

118 Ee, bongo, liboso nákende, atindelaki ngai mokanda, pe alobaki: “Nakoya kuna, ntango kaka ókozonga. Nazali na mposa ya libatishi ya Molimo Mosantu yango, oyo ozali kolobela.”

119 Boye, bomoni, kaka epai ozali na . . . Soki nazalaki na mposa wana, ya koloba: “Oh, bozali na ntina te. Ebongiseli na bino ya kala wana, ezali na ntina te, pe—pe bato na bino nyonso ya Eglise de Christ bazali na ntina te. Bozali malamú te. Bozali—bozali milimo mabe.” Nalingaki kolonga mobali wana ata moke te. Pe soki náyebisaka ye ete nalingi ye, kasi na motema na ngai ezalaki bongo te, alingaki koyeba yango malamú koleka. Nde ndenge ezali mpenza. Osengeli koloba yango kati na motema na yo.

120 Pe ezalaka bongo na ba-mpokwa ntango namataka na etumbelo, na ntango ya kososola makanisi, bomoni. Nakanisaka yango te. Naliaka nde kaka te, nsima ya bilei ya midi; kaka kokila pe kobondela, pe kofanda kati na biró. Mpamba te, Alakaki ngai ete Akosala yango. Yango wana ngai pe nakendeke ata na mwa ntembe moke te, mpo Alakaki ete Akosala yango. Boye, bomoni, ngai. . . Nayebi ete mposa na ngai ezali (nini?), ntina oyo nazali kolanda ezali (nini?), mpo Bokonzi na Nzambe ékende liboso.

121 Soki moto akei ngambo *oyo*, ngambo *oyo kuna*, ata na losambo nini ye akendeke; na ntango nyonso oyo ye ayei epai na Klisto, ezali likambo te mpo na ngai. Pe yango nde ezali kati na motema na ngai. Bomoni? Pe likambo te, soki tokei kosangana na Eglise de Christ, ezali na yango mabe te. Ezali malamú. Soki ye. . . Lingomba oyo alandaka, ezali likambo te mpo na ngai. Kasi na ntango nyonso oyo nalongi molimo na ye mpo na Klisto, yango nde likambo ya motuya.

<sup>122</sup> Bongo, nalobaki: “Ndeko Ness, ezali te mpo na kozala na bokeseni. . .” Sikawa nako. . .Ndeko, nakoki kosalela *oyo?* [Ndeko yango alobi: “Iyo.”—N.D.E.] Nalobaki: “Nalingi koloba pe kolimbola.” Pe, na boye, nakoki koyebisa bino, bandeko oyo bozali awa. Kasi, bóloba likambo oyo na ba-losambo na bino te. Soki bokolinga, pe bosalisa ngai, bótika názala bobele—bobe—bobe ndero na bino. Bomoni? Pe ngai, soki—soki nazali na libunga, boye bólimbisa ngai. Kasi nalingi kolimbolela bino, lokola bitonga nyonso mibale ezali awa na ntongo oyo, ná ya ba-Unitaire ná ba—ba-Assemblée pe, ná bayambi ya bo-trinitaire.

<sup>123</sup> Sikawa nalingi koloba likambo oyo. Nalingi koloba ete ngai nandimi ete ngámbo nyonso mibale bazali na libunga, na ntango nyonso oyo bazali koswana bamoko na bamosusu, mpo ba-mposa na bango ezali mabe. Pe na ntango nyonso oyo ba-mposa na yo ezali mabe; etali te ntina nini yo ezali kolanda, kasi ba-mposa na yo mpo na likambo ozali kolanda ezali mabe, boye ekosimba ata moke te. Ya solo.

<sup>124</sup> Sikawa, bato mosusu balobaki: “Ndeko Branham, ozali moto ya Jesus Seul.” Nalingi koloba ete wana ezali libunga. Nazali moto ya Jesus Seul te.

<sup>125</sup> Moto moko alobi: “Ndeko Branham, ozali moto ya Trinitaire?” Te, misie. Nazali moto ya Trinitaire te. Nazali Moklisto. Omoni? Na—na—nandimi te. . .Liloba oyo, moto ya bosato bosantu, ekomami ata kati na Biblia te, liloba “bosato bosantu.” Pe nandimaka te ete Banzambe bazali misato, ya kokesana.

<sup>126</sup> Nandimaka ete Nzambe azali bobele moko kati na misala misato; Tata, Mwana, Molimo Mosantu. Yango mpenza nde ntina tozuaki etinda ya kobatisa na Nkombo ya Tata, Mwana, Molimo Mosantu. Nandimaka ete ezali Nzambe azali komikitisa, azali kokita.

<sup>127</sup> Sikawa, Nzambe, ntango Amonanaki liboso epai na moto, Azalaki na lolenge ya Likonzi na Móto. Bondimi yango, boye te? Li. . .Motangi nyonso ya Biblia ayebi ete Likonzi na Móto oyo ezalaki na esobe ezalaki Logos, ete wana ezalaki Mwanje na Kondimana, oyo ezalaki Klisto.

<sup>128</sup> Mpamba te, Alobaki. . .Azalaki. . .Ezalaki te. . .Nabanzi ezali na Yoane 6, Alobaki: “Liboso Abraham ázala,” ete “NGAI NAZALI.” Azalaki “NGAI NAZALI.”

<sup>129</sup> Boye, oyo wana ezalaki Nzambe, ya bulée; ata soki moto asimbaki ngomba yango, asengelaki kobomama, bomoni. Malamu. Sikawa, Nzambe moko wana azalaki koluka komizongisa Ye moko kati na ekelamu na Ye oyo Ye akelaki. Kasi, Akokaki koya pene na bango te, mpo bazalaki basumuki, pe makila ya ba—ntaba ná ba—mpate etikálá kolongola lisumu te. Toyebi yango. Ezalaki bobele kozipa masumu.

<sup>130</sup> Sikawa, kasi Nzambe moko wana oyo azaláká Likonzi na Móto, Akómaki mosuni, na nzela ya Mwana na Ye, pe afandaki na nzoto moko ebengami Nkolo Yesu Klisto. Biblia elobi: “Litondi mobimba ya Bonzambe efandaki kati na Ye na motindo ya nzoto.” Pe Yesu alobaki na . . . Ee, na Timote ya Liboso 3:16: “Na ntembe te, libombami ya makambo na bonzambe ezali monene.” Soki bango bakokaki kobenga yango monene, bongo, biso tokosala nini, bomoni? “Libombami na Nzambe ezali monene, mpo Nzambe amonisamaki kati na mosuni, pe amonamaki na banje, pe anetolamaki na Nkembo,” pe bongo na bongo. Sikawa, pe na Yoane 14, Alobaki na Toma: “Ntango omoni Ngai, omoni Tata. Mpo na nini olobi, ‘Lakisa biso Tata?’” Biblia elobi, ete, “Nzambe azalaki kati na Klisto, kozongisa mokili na boyokani na Ye moko.”

<sup>131</sup> Sikawa, Nzambe akoki kozala bato misato te, Banzambe misato. Yesu pe akoki kozala Tata na Ye Moko te, kati na moko. Bomoni? Boye, bomoni, esali ete nyonso mibale ézala mpenza na libunga.

<sup>132</sup> Sikawa, pe sikawa soki botali malamumu, esika moko te ezali . . . Soki tozali na Banzambe misato, tozali bapagano. Wana, toyebi yango.

<sup>133</sup> Lokola Moyuda moko alobaki na ngai mokolo moko, ntango nazalaki kosolola na ye, alobaki: “Nani kati na bango azali Nzambe na bino? Oyo wapi nde Nzambe na bino; Tata, Mwana, to Molimo Mosantu? Oyo wapi nde azali na bino?”

Nalobaki: “Ee, Banzambe bazali misato te.”

<sup>134</sup> Alobaki: “Bokoki te kokata—kokata Nzambe na biteni misato pe bópezá Ye na Moyuda.”

Nalobaki: “Te, misie.” Nalobaki . . .

<sup>135</sup> Ntango John Rhyn abikisamaki na bokono ya kokufa miso, kuna na Fort Wayne, boyebi; pe lábi oyo awa ya Mishawa- . . . to na Fort . . . Benton Harbor. Alobaki: “Bokoki te kokata Nzambe na biteni misato pe bópezá Ye na Moyuda.”

<sup>136</sup> Nalobaki: “Ata moke te. Nazali kosala bongo te.” Nalobaki: “Labi, ekoki kozala likambo ya makasi mpo na yo kondima basakoli?”

Alobaki: “Te.”

<sup>137</sup> Nalobaki: “Na Yisaya 9:6, azalaki kolobela nani: ‘Mwana abotameli biso, Mwana apesameli biso, akobengama Mosungi, Nzambe na Nguya, Nkolo na Kimia?’”

Alobaki: “Wana ezalaki Masiya.”

Nalobaki: “Bongo, labi, Masiya akozala nani mpo na Nzambe?”

Alobaki: “Akozala Nzambe.”

<sup>138</sup> “Yango nde likambo oyo ngai nakanisaki.” Bomoni? Sikawa, bomoni, ya solo mpenza. Yango nde oyo Ye azali. Bongo nalobaki: “Yebisa ngai sikawa esika nini Yesu azangaki kokokisa mpenza oyo mosakoli alobaki ete Akosala.” Pe abandaki kolela pe kotambola-tambola. Nalobaki: “Na nzela na Yango, John Rhyn amoni lisusu.” Bomoni?

Pe alobaki: “Mosika na Nzambe likanisi ya kozala na mwana!”

<sup>139</sup> Nalobaki: “Yawe monene azipaki mwasi moko na elili na Ye, ndenge mosakoli alobaki ete Akosala, pe Akelaki momboto ya Makila. Pe na nzela ya momboto wana ya Makila nde esika nzoto ya Klisto eutaki.

<sup>140</sup> “Tala, na Kondimana na Kala, Labi,” nalobaki, “ntango moto akei kopesa mbeka, azalaki komema mwana na mpate. Ayebaki ete abukaki mibeko ya Nzambe, boye azalaki komema mwana na mpate. Azalaki koyambola masumu na ye, pe bazalaki koboma mwana na mpate yango. Wana mpa . . . wana azalaki maboko na ye likolo na mwana na mpate yango; koyambola ete ayebaki ete asengelaki kokufa mpo na lisumu na ye, kasi mwana na mpate azuaki esika na ye. Pe momboto ya makila epasukaki; pe azalaki kosimba mwa mwana na mpate yango na maboko na ye kino áyoka ete mwa bomoi na ye ebimi kati na yango, pe nzoto na yango ekómi makasi. Bongo nganganzambe, na ntembe te, azalaki kobwaka makila likolo na—likolo na móto, etumbelo ya motáko ya kosambisama.”

<sup>141</sup> Bongo nalobaki: “Boye, moto yango azalaki kolongwa na esika wana, koyeba ete mwana na mpate asilaki kozua esika na ye, kasi azalaki kobima na mposa yango moko oyo azalaki na yango ntango akotaki, bomoni, mpamba te ekokaki kolongola lisumu te. Bomoni? Kasi, nde, na mbala oyo: ‘Awa esili mosambeli kopetwa mbala moko mpo na libela, azali lisusu na lisumu kati na lisosoli na ye te.’ Kuna, mbeka ezalaki kopesama mobu na mobu. Kasi,” nalobaki, “lelo, na mbala oyo, tozali na, ‘awa esili mosambeli kopetwa, azali lisusu na lisumu kati na lisosoli na ye te.’ Mpamba te . . .”

<sup>142</sup> “Tala, Labi. Na kati ya hemoglobine, mwa bomoi oyo ebandaka kati na momboto, oyo eutaka na nzoto ya mobali, pe ekotaka kati na mwasi. Pe mwasi azalaka na líki; kasi, nsoso ya mwasi ekoki kobota líki, kasi soki etikali kozala esika moko na nsoso ya mobali te, líki yango ekototolama mokolo moko te.”

<sup>143</sup> Pe nalobaki: “Bongo Nzambe, oyo aleki monene, oyo atondisá ntango pe bisika nyonso, amikómisaki moke mpenza, momboto moke na libumu ya mwasi moko.” Na bongo nalobaki: “Ntango tobikisami lelo . . . Yesu azalaki Moyuda te, Moto ya mabota pe te, mpo líki esalaki bobele mosuni. Makila nde ezalaki na Bomoi. Bongo biso to—tozali . . . Biblia elobi: ‘Tobikisami na Makila na Nzambe.’ Bomoni, Azalaki Moyuda te, to Moto ya

mabota te; Azalaki Nzambe. Yango wana, ntango toyáka na etumbelo pe totiaka maboko na biso, na kondima, likolo na motó na Ye, toyokaka mpasi pe nsomo ya liwa na Ye na Gologota, pe toyambolaka masumu na biso, ete tokwei na likambo, kasi Ye akufaki na esika na biso!”

144 “Bongo, omoni,” nalobaki, “makila ya mwana na mpate kuna ekokaki kozonga likolo na ye te, makila oyo. . . Momboto epasukaki, pe bomoi oyo ekangolamaki, ntango momboto ya makila ya mwana na mpate yango epasukaki, ekokaki kozonga likolo na mosambeli te, mpo ezalaki bomoi ya nyama, pe ekokaki kolóngobana ná bomoi ya moto te.

145 “Kasi mbala oyo, ntango momboto yango ya Makila epasukaki, ezalaki bobele moto te. Ezalaki Bomoi na Nzambe, nde ebimaki. Pe ntango mosambeli atii maboko na ye, na kondima, likolo na Mwana na Nzambe, pe ayamboli masumu na ye; bomoi ya moto mosusu te, kasi Bomoi na Nzambe ezongi kati na moto yango, yango ezali Bomoi na Seko. Liloba *Zoe*, elingi koloba ‘Bomoi ya Nzambe Ye moko.’ Pe Alobaki Akopesa biso *Zoe*, Bomoi na Seko, pe lelo tozali bana mibali pe bana basi na Nzambe. Yango mpenza.”

146 Nalobaki: “Sikawa, yango ezali nini? Ezali Nzambe, komikitisáká. Ayaki, liboso; ‘moto moko te akokaki kosimba Ye,’ mpo moto asumukaki. Na sima Akitaki kati na nzoto moko, ‘mpo na komeka lisumu. . . kozua lisumu.’ Bomoni, Ye, likambo bobele moko oyo Nzambe akokaki kosala, mpo na kozala sembo, ezalaki nde kosala yango ndenge wana.”

147 Ndakisa, nini elingaki kosalema soki nazalaki na bokonzi likolo na eyanganelo oyo na ntongo oyo, lokola oyo Nzambe azalaki na yango likolo na bato, pe nalobaki: “Moto ya liboso oyo akotala likonzi wana, akokufa,” pe Tommy Hicks atali yango? Sikawa, ndakisa, nazui Carl-. . . “Ndeko Carlson, yo kufela ye.” Elingaki kozala sembo te. Nakokaki koloba: “Leo, ozali sekretère na ngai; yo kufela ye.” Elingaki kozala sembo te. “Billy Paul, mwana na ngai, yo kufela ye.” Ezali sembo te. Lolenge moko kaka oyo nakoki kozala sembo, ezali ete ngai moko názua esika na ye.

148 Pe yango nde likambo oyo Nzambe asalaki. Ye, Nzambe, azali Molimo. Pe Akelaki. . . Ye, Abongolaki mosala na Ye. Esengelaki nde ézala likambo moko ya kokamwisa, epai na bato, kokanisa na ntina na Yawe moke. Akokaki koya, lokola mobali oyo akoli, kasi Ayaki na elielo ya bibwele, likolo na eboke ya matiti. Yawe moke, azali kolela lokola bebé. Yawe moke, azali kosakana lokola mwana mobali. Yawe moke, azali kosala mosala ya mabaya, lokola moto ya mosala. Yawe moke, elenge mobali. Yawe, atiami katikati ya likolo pe mabele, ná ba-fulufúlu ya balangwi masanga pe nsói ya basoda na elongi na Ye. Yawe, azali kokufa mpo na bana na Ye. Yawe, azali kokufa, mpo na kosikola;

moto mosusu te, kasi Nzambe Ye moko! Bomoni, Nzambe, wana ezalaki mosala na Ye. Mpo na nini? Azali koluka kozonga na motema na bato.

<sup>149</sup> Sikawa, tokokaki kosimba Ye te, *Kuna. Awa*, tosimbaki Ye na maboko na biso. Sikawa, Asalaki nini, na nzela na mbeka ya nzoto wana? Akómaki Yawe *kati* na biso. Bisó tozali biteni na Ye. Na Mokolo ya Pantekote, Likonzi na Móto ekabwanaki Yango moko, pe ndémo na Móto efandaki likolo na moko na moko, kolakisa ete Nzambe azalaki komikabola Ye moko kati na Lingomba na Ye.

<sup>150</sup> Bongo, bandeko, soki tokoki bobele kosangana, pe komema Yango esika moko! Na ntango wana nde tozui Yawe na litondi, ntango tosangani elongo. Kasi ndenge nini tokoki kosala yango, na ntango oyo *songolo* moko azali koloba minoko na sika pe azali na libatisi, *pakala oyo* boye; kasi tobateli ndémo na Móto *oyo* awa, pe *oyo* boye? Tosangisa Yango.

<sup>151</sup> Na Mokolo na Pantekote, ntango Nzambe akitaki, Biblia elobi: “Ndémo na Móto efandaki na motó ya moko moko na bango.” Pe bango. . . “Ndémo, lokola Móto,” ndémo. Ezalaki Likonzi na Móto wana, nde ekabwanaki Yango moko pe emikabolaki Yango moko, kati na bato, mpo tózala bandeko. “Na mokolo yango, bino bokoyeba ete Ngai nazali kati na Tata, Tata kati na Ngai; Ngai kati na bino, pe bino kati na Ngai.” Pe, biso, tozali moko. Tozali moko, tokabwani te.

<sup>152</sup> Sikawa, na likolo *Awa*, Yawe Nzambe akokaki kosimba bato te, likolo ya mobeko na Ye Moko ya bosantu; Yawe Nzambe akómaki lisumu mpo na biso, pe afutaki ntalo; ete Yawe Nzambe moko yango ákoka koya kofanda *kati* na biso. Nzambe *likolo* na biso; Nzambe *elongo* na biso; Nzambe *kati* na biso. Banzambe misato te; Nzambe moko! Balakisi bazali kobela liboma, kolukáká kososola Yango. Ezali—ezali nde emoniseli. Yango esengeli nde komonisamela yo.

<sup>153</sup> Sikawa, sikawa, na oyo etali libatisi, sikawa, bato mingi. . . Sikawa, bosengeli kosala yango, bandeko. To, ezali ndenge nalobaki na Ndeko Scism pe na Ndeko Ness, ete soki bo. . . Ko—Kowelana ebandaki. Pe moto nyonso, mingi kati na bino bato ya mayele mingi awa, bozali na makoki mingi koleka ngai; kasi ngai nayekoli likambo yango mpenza. Pe natangá buku ya *Batata ya Liboso ya Nicée, Likita ya Nicée*, ná bakomi nyonso ya masolo ya kala, pe bongo na bongo.

<sup>154</sup> Likambo yango balobelaki yango kuna na Likita ya Nicée. Ngámbo nyonso mibale ebótaki eloko malamú te; ntango lingomba Katoliko ekamataki ngambo makasi ya ba-trinitaire, pe oyo mosusu bamikómisaki ba-unitaire, pe ngámbo nyonso mibale bakendeki pembeni. Ya solo mpenza, mpamba te bato bazalaki na kati ya likambo yango.

<sup>155</sup> Bosengeli kotika Nzambe asala yango, tozali na ntina ya koluka kososola yango te. Tózala bandeko. Tókende kaka liboso pe tótika Nzambe ásala likambo oyo Alingi kosala. Soki Azali na suka te pe Ayebi makambo nyonso, pe Akanisaki suka uta na ebandeli, ndenge nini biso tokoki kozala na likambo ya kosala mpo na yango? Bókoba bobele kokende liboso. Ndenge wana nde. Bókoba na etámboli wana, ndenge nalobaki lobi na mpokwa, elongo na Yosua na biso monene.

<sup>156</sup> Sikawa bótala, soki Banzambe bazali misato. . . Nalingi bobele kolakisa bino ndenge nini likambo yango ezangi ntina. Soki banzambe bazali misato, boye Yesu azalaki Ye Moko Tat- . . . Yesu akokaki kozala Tata na Ye Moko te, lokola azali moko. Pe, soki bazali misato, Abotamaki na mbotama ya mongondo te. Sikawa bato boni. . . [Ndeko Branham alimboli yango, asaleli biloko misato—N.D.E.] Nakoloba *oyo* ezali Nzambe Tata; *oyo* ezali Nzambe Mwana; pe *oyo* ezali Nzambe Molimo Mosantu.

<sup>157</sup> Sikawa, mpo na bino bandeko ndenge na ndenge oyo bozali awa, bótala likambo oyo kaka miniti moke, bokomona nini nazali koluka kotalisa. Nasengi ete Nzambe ámonisa bino yango. Sikawa, bótala, bino mibale bondimaka eloko moko, kasi zabolo amikotisi katikati na bino pe akaboli bino mpo na likambo yango. Ezali mpenza eloko moko, pe nakotalisa bino yango polele, na lisungi ya Nzambe, pe na Biblia ya Nzambe. Soki ezali Biblia te, boye bóyamba yango te. Ya solo.

<sup>158</sup> Kasi sikawa bótala. [Ndeko Branham alimboli yango, asaleli biloko misato—N.D.E.] *Oyo* ezali (nini?) Nzambe Tata; *oyo* ezali Nzambe Mwana; *oyo* ezali Nzambe Molimo Mosantu. Boye, sikawa, tótelema naino mwa moke, kotalisa baoyo misato kuna; Nzambe Tata, Mwana, pe Molimo Mosantu.

<sup>159</sup> Oh, na—nakozala na ntango ya kosala yango te. Ngai. . . [Bandeko balobi: “Koba na yo! Koba na yo!”—N.D.E.] Kasi, bomoni, ee, nakosala nokinoki mpenza. Bólimbisa ngai, bandeko na ngai, kasi na—na—natikálá kozua libaku ya kosolola na bino te, pe—pe nalingi kosala yango.

<sup>160</sup> Na bongo, bótala; Nzambe Tata, Mwana, Molimo Mosantu. Sikawa, Nani azalaki Tata ya Yesu Klisto? Nzambe nde azalaki Tata ya Yesu Klisto. Bisu nyonso tondimi yango. Ezali bongo? [Losambo balobi: “Amen.”—N.D.E.] Malamu.

<sup>161</sup> Sikawa, soki tozui Matai 28:19, ntango Yesu alobaki: “Boye, bókende kozalisa bayekoli na mabota nyonso, kobatisa bango na Nkombo ya Tata, Mwana, Molimo Mosantu,” Sima na mikolo zomi, Petelo alobaki: “Bóbongola mitema, pe bóbatisama na Nkombo na Nkolo Yesu Klisto.” Kotelemelana moko mpenza ezali na esika moko boye. Sikawa, tómeke te. . . ezali na. . .

<sup>162</sup> Moto nyonso asíli kotatola, pe nyonso. Tala yango oyo. Kondima na ngai yango oyo, pe nazali bobele kotalisa yango

polele liboso na bino, bandeko. Nalobaka yango na biteyelo te; wana etali bino. Kasi nalingi kolakisa bino eloko ngai namonaka na ngámbo nyonso mibale, mpo Molimo Mosantu ámonisa bino yango, bomoni.

<sup>163</sup> Sikawa, Matai 28:19, pe soki—soki Matai 28:19 ezali kotelemela Misala 2:38, boye kotelemelana moko ezali na kati ya Biblia, pe Ezali ata na motuya ya lokasa oyo bakomeli Yango te.

<sup>164</sup> Sikawa, soki botali malamumu na Matai, mokapo ya 16, Yesu apesaki Petelo emoniseli, pe Apesaki ye bafungola.

<sup>165</sup> Sikawa, bóbosana te, Biblia emonisamaka te na likindo ya mwango moko oyo bato babongisi. Ezali bongo te. Ezali emoniseli.

<sup>166</sup> Ezalaki emoniseli, mpo na kobanda. Mpo na nini Abele apesaki Nzambe mbeka ya motuya koleka oyo ya Kaina? “Emonisamelaki ye,” ete ezalaki ba-mbuma ya pèche, ya ba-póme, ya malálá, ya ba-póme te. Soki ba-póme ekoki kosala ete basi básosola ete bazali bolumbu, malamumu tópesa bango lisusu ba-póme, ndeko. Okanisi bongo te? Sikawa, yango, emonani lokola kotúka, kasi nalingi koloba bongo te. Kasi, ezalaki ba-póme te. Te, misie. Sikawa, pe soki ezali bongo, boye, “Emonisamelaki Abele,” ete azalaki makila ya tata na ye. Na bongo, apesaki mbeka ya makila, mpo ezalaki emoniseli. Likambo yango mobimba etongami likolo na yango.

<sup>167</sup> Sikawa bótala, mobange molobi mbisi oyo azali moínga, atángá ata ndambo te. . . Biblia elobi ete azalaki moíngá pe ayekolá te. Kasi azalaki wana, pe Yesu atunaki motuna: “Bolobaka Ngai Mwana na moto nazali nani?”

<sup>168</sup> Moko alobaki: “Ee, Ozali—Ozali Mos- . . .” To, “Ba-balobaka: ‘Ozali Mose.’”

“Nani bango, bango balobaka ete Ngai Nazali?”

Moko alobaki: “Ee, Ozali Yilimia to basakoli, pe *oyo, oyo kuna, to oyo mosusu.*”

<sup>169</sup> Alobaki: “Wana nde motuna yango te. Natuni nde *bino*. Bino bolobaka ete Ngai nazali Nani?”

<sup>170</sup> Pe Petelo atatabanaki te, pe alobaki: “Ozali Mwana na Nzambe.”

<sup>171</sup> Pe Alobaki: “Esengo na yo, Simona, mwana na Yona.” Sikawa, bótala malamumu. “Mosuni pe makila emonisi yo yango te, kasi Tata na Ngai oyo azali na Likolo.” Bomoni?

<sup>172</sup> Sikawa, bótala malamumu, sikoyo, lingomba Katoliko elobaka ete Atongaki Lingomba likolo na Petelo. Ezali lokuta.

<sup>173</sup> Lingomba Protestant elobaka: “Atongaki yango likolo na Ye moko.” Kasi sikawa bótala malamumu mpo bóyeba, bómoma soki ezali bongo.



174 Atongaki yango likolo na emoniseli ya molimo ya Nani Ye azalaki, bomoni, mpo Alobaki: “Esengo na yo, Simona, mwana na Yona. Mosuni pe makila emonisi yo yango te. Nalobi ete ozali Simona; likolo na libanga yango” (libanga nini? emoniseli) “Nakotonga Lingomba na Ngai, pe bikuke na ewelo ekoki kolonga liboso na Yango te.” [Ndeko Branham abeti likolo na eteyelo mbala misato—N.D.E.]

175 Bongo, ntango Petelo azalaki wana, ntango Matai 28 elobamaki, abalukaki pe, sima na mikolo zomi, ná emoniseli yango, abátisaki na Nkombo na “Nkolo Yesu Klisto.” Mpo na nini asalaki bongo? Azalaki na emoniseli ya Nzambe; pe azalaki na bafungola ya Bokonzi, ndeko.

176 Sikawa, ntango mosusu nakoyokisa bino mitema mpasi mpo na mwa miniti, ngámbo moko na kati na bino, kasi bótelema mwa moke. Ezali na esika moko te kati na Biblia, epai oyo moto moko atikalá kozua libatisi na Nkombo ya “Tata, Mwana, Molimo Mosantu.” Ezali na esika moko te kati na Makomi. Pe soki ezali, bólakisa yango. Pe soki bokoki komona yango ata na esika nini kati na lisitualé ya bulée, kino kosalema ya lingomba Katoliko, nalingi ete bólakisa yango. Esika moko ezali te, nde, pe ezali solo.

Kasi sikawa, bozela mwa moke, bino ba-Unitaire, kaka mwa moke.

177 Sikawa, ezali na esika moko te epai wapi. . . Soki moto moko akoki kolakisa ngai eteni moko mpamba ya Likomi, epai wapi molulu wana esalemaki na kati na Biblia, ya “Tata, Mwana, Molimo Mosantu,” esengami na yo ya koya koyebisa ngai esika nini moto abatisamá ndenge wana.

178 Pe bamosusu kati na bango balobaka: “Ee, ngai nakozua oyo Yesu alobaki, kasi oyo Petelo alobaki te.” Soki bazalaki na kotelemelana, moko na mosusu, tokosala nini? Soki yango mobimba ezali Nzambe te, eteni nini ya Biblia ezali malamamu?

179 Esengeli kokutana pe kosangana na mobimba, pe ezali bobele emoniseli ya Nzambe. Biteyelo na biso ekolakisa yango mokolo moko te. Ezali emoniseli, nde bosengeli komona Yango.

180 Boye, soki bato mibale wana bazalaki na kotelemelana, moko na mosusu, boye Biblia ya ndenge nini biso tozali kotanga? Ndenge nini nakoyeba soki Yoane 14 ezali solo, to te? Ndenge nini nakoyeba soki Yoane 3 ezali solo, to te? Ndenge nini, ndenge nini, ndenge nini nakoyeba? Bomoni?

181 Kasi lolenge bobele moko oyo nakoki kozala na kondima epai na Nzambe, ezali koyeba ete Biblia oyo ezali solo, pe kondima ete Ezali solo, pe kokangama na Yango. Ata nasosoli Yango te, nakokoba na Yango, ata bongo.

182 Kasi ntango ba-kotelemelana oyo eyei, boye nakobeleva liboso na Nzambe, mpo na koyeba. Pe Mwanje moko oyo

akutanaka na ngai na liyangani, pe na butu, azali Ye Moko nde alakisaki ngai likambo Oyo. Bomoni? Sikawa, bótala soki ezali likambo oyo, lolenge oyo ezali sika.

<sup>183</sup> Sikawa, Matai 28:19, tótala yango malamú mwa moke sikawa. Pe sikawa, nakozua Misala 2:38 bobele awa, esika Petelo alobaki: “Nkolo Yesu Klisto.” Pe Matai alobaki: “Tata, Mwana, Molimo Mosantu.”

<sup>184</sup> Sikawa, bóyoka. Alobaki: “Bóbatisa bango. . .” Ezali te “na nkombo ya Tata, na nkombo ya Mwana, na nkombo ya Molimo Mosantu.” Atikálá koloba bongo te. “Nkombo. . . na nkombo. . . na nkombo” ezali te.

<sup>185</sup> Atikálá koloba te: “Bóbatisa bango na *bankombo* ya Tata, Mwana, pe Molimo Mosantu,” mpamba te ezali ata na ntina te.

<sup>186</sup> Alobaki: “Bóbatisa bango na Nkombo (N-k-o-m-b-o) ya Tata, Mwana, pe Molimo Mosantu.” Ezali solo? [Losambo balobi: “amen.”—N.D.E.] “. . . ya Tata, Mwana, pe Molimo Mosantu,” likangisi, “pe, pe, pe.”

<sup>187</sup> Ezali te “bankombo.” Ezali te “na nkombo ya Tata, nkombo ya Mwana, nkombo ya Molimo Mosantu.” Ezali te, “na *bankombo* ya Tata, Mwana, pe Molimo Mosantu.” Kasi, “na Nkombo,” N-k-o-m-b-o, na bomoko, “ya Tata, Mwana, pe Molimo Mosantu.” Sikawa, nkombo nini kati na yango esengeli, mpo na kobatisa na yango? Ezali Nkombo kaka moko. Ezali oyo wapi? “Tata” nde nkombo oyo esengeli, to “Mwana” nde nkombo oyo esengeli, to “Molimo Mosantu” nde nkombo oyo esengeli?

<sup>188</sup> Ezali “Nkombo” moko, esika moko boye. Ezali solo? [Losambo balobi: “Amen.”—N.D.E.] Ee, boye nalingi kotuna bino likambo moko sikawa. Soki “Nkombo” yango, bongo, soki Yesu alobaki, “bóbatisa bango na Nkombo ya Tata, Mwana, pe Molimo. . .” Bato boni bandimi ete Yesu alobaki bongo? [“Amen.”] Wana nde Likomi yango. Ezali Matai 28:19, “Na Nkombo ya Tata, Mwana. . .”

<sup>189</sup> [Ndeko Branham amoni eloko moko oyo ebendi makanisi pembeni—N.D.E.] Ezali nde eloko moko oyo biso. . . Te, ezali, nakanisaki. . . Malamú, misie. [Ndeko mobali moko alobi: “Limbisa ngai, Ndeko Branham?”] Iyo. [“Nalingi kobalola nde bande oyo, pe nalingi kozanga yango te.”] Malamú. [Eteni oyo ezangi maloba na bande.] . . . ? . . .

<sup>190</sup> Sikawa, “na Nkombo ya Tata, Mwana, pe Molimo Mosantu.” Sikawa bóyoka, bandeko. “Tata” lokola nkombo ezalaka te, mpo ete *Tata* ezali nkombo te. Ezali ebiangelo. “Mwana” lokola nkombo ezalaka te, mpo ete *Mwana* ezali ebiangelo. “Molimo Mosantu” lokola nkombo ezalaka te. Yango nde oyo Ye azali.

<sup>191</sup> Nazalaki koloba yango na ntongo moko na likita ya batei, na bilei ya ntongo, pe mwasi moko. . . Na ntembe te, moto nyonso oyo akokata yo maloba ndenge wana azali libanda ya molongo.

Mwasi yango alobaki: “Zela mwa moke! Yebisa ngai!” Alobaki: “Molimo Mosantu ezali nkombo.”

<sup>192</sup> Nalobaki: “Ezali nde oyo Yango ezali. Ngai nazali moto, kasi ‘Moto’ ezali nkombo na ngai te.”

<sup>193</sup> Ezali Molimo Mosantu. Yango ezali nkombo te. Ezali nde oyo Yango ezali. Ezali ebiangelo, na ntembe te, kasi ezali te. . . Ezali—ezali. . . Ezali nkombo te.

<sup>194</sup> Sikawa, soki Alobaki: “Bóbatisa bango na Nkombo ya Tata, pe ya Mwana, pe ya Molimo Mosantu,” kasi Tata, to Mwana, to Molimo Mosantu, ezali nkombo te, boye nkombo yango ezali nini? Tozali na mposa ya koyeba.

<sup>195</sup> Sikawa, tokoki kozua yango nyonso na esika moko awa, soki bolandi na bokebi pe—pe—pe kosalela mwa ntango, to, nalingaki koloba, kobatela mwa ntango. Sikawa, bótala Matai 28:19. Sikawa, nalobi te ete. . .

<sup>196</sup> Mbala mosusu, ntango mosusu bosálá yango, bamosusu kati na bino, bandeko basi to mibali. Ntango mosusu okamataki buku moko, mokolo moko, pe otalaki na suka na yango, pe elobaki: “Yoane ná Maria babikaki na esengo sima na nyonso.” Ee, Yoane ná Maria nde banani? Nini yango. . . Yoane ná Maria, oyo babikaki na esengo sima na wana, nde banani? Nzela ezali bobele moko oyo okotikaláká koyeba nani Yoane ná Maria bazali; elingi koloba, soki yango ezali libombami mpo na yo, zongela kotanga buku yango. Boye te? [Losambo balobi: “Amen.”—N.D.E.] Zonga na ebandeli pe tanga yango kino na suka, pe ekoyebisa nani oyo Yoane ná Maria bazali.

<sup>197</sup> Ee, soki Yesu alobaki, Yesu Klisto Mwana na Nzambe, oyo alobaki: “Boye, bókende kozalisa bayekoli na mabota nyonso, kobatisa bango na Nkombo ya Tata, Mwana, pe Molimo Mosantu,” pe *Tata*, *Mwana*, to *Molimo Mosantu* ezali nkombo te. Boye, soki ezali libombami, malamú tózonga na ebandeli ya Buku.

<sup>198</sup> Sikawa, tózonga na mokapo ya 1 ya Matai, pe tokobanda wana, epesi mabota, ekiti kino na molongo ya 18.

<sup>199</sup> Sikawa bótala malamú, sikawa bótala malamú kaka mwa moke. [Ndeko Branham alimboli yango, asaleli biloko misato—N.D.E.] *Oyo* ezali Tata, na loboko na ngai ya mobali; *oyo* na katikati ezali Mwana; pe *oyo* ezali Molimo Mosantu. Sikawa, *oyo* ezali Tata ya Yesu Klisto. Boye te? [Losambo balobi: “Amen.”] Nzambe azali Tata ya Yesu Klisto. Biso nyonso tondimi yango? [“Amen.”] Malamú.

<sup>200</sup> Sikawa, Matai 1:18 elobi:

*Kobotama na Yesu Klisto ezalaki boye: Esili. . . Maria, mama na ye, kobandama na Yosefe, kasi liboso ete ye. . . bafanda ndako moko, azuaki zemi moko na nguya ya. . .*

201 [Losambo balobi: “Molimo Mosantu.”—N.D.E.] Ngai nakanisaki ete *Nzambe* nde azalaki Tata na Ye.

*Akobota mwana mobali, . . . bango kobenga ye YESU: . . .*

*Pe mobali na ye Yosefe, azalaki moto na boyengebene, . . . aboyaki komonisa ye nsoni na miso na bato, kasi akani kolongola ye na nkuku.*

*Na bongo, ezalaki ye kobanzabanza bongo, tala, mwanje na Nkolo amonani na ye na liloto, alobi, Yosefe, mwana na Dawidi, banga kokamata Malia mwasi na yo te: zambi zemi oyo azali na yango, euti na nguya ya . . .*

202 [Losambo balobi: “Molimo Mosantu.”—N.D.E.] Nakanisaki Nzambe nde azalaki Tata na Ye. Sikawa, bandeko, Azali na batata mibale? [“Te.”] Akoki kozala na bango te. Soki Azalaki bongo, boye Azalaki mwana makango, wana losambo ya lolenge nini biso tozali na yango? Bosengeli kondima ete Nzambe Tata ná Molimo Mosantu, bazali bobele Molimo moko. Solo mpenza, Ezali bongo. Solo mpenza, Ezali bobele Molimo moko. Sikawa, tosilisi, pe tomoni yango.

*Akobota mwana mobali, pe bango bakobianga nkombo na ye YESU: mpo ye akobikisa bato na ye na lisumu na bango.*

*. . . oyo mobimba esalemaki mpo na kokokisa . . .*

203 Nazali kotanga Likomi. Bino batei boyebi, wana nazali kokóba.

*. . . mpo na kokokisa . . . mosakoli alobaki, na nzela na Nkolo, ete,*

*. . . ngondo akokumba zemi, pe . . . kobota mwana, pe bakobianga nkombo na ye Emanuele, oyo na ndimbola . . .*

204 [Ndeko Branham apemi. Losambo balobi: “Nzambe elongo na biso.”—N.D.E.] “Nzambe elongo na biso!” Ezali bongo? [“Amen.”]

205 Boye, Nkombo ya Tata, Mwana, Molimo Mosantu ezali nini? [Ndeko mobali moko alobi: “Yesu Klisto.”—N.D.E.] Ee, na ntembe te mpenza. Yango nde ntina oyo Petelo abatisaki bango na Nkombo na “Yesu Klisto.”

206 Kasi, etali ngai te, soki obatisamaki na nkombo ya Rose ya Saron, Lisi ya Lobwaku, Monzoto ya Ntongo, yango pe ezali bibiangelo. Soki motema na yo ezali sembo mpo na Nzambe, Ye ayebi motema na yo.

207 Kasi sikawa, nde, nalobaki bongo. Boye, sikawa, nalobaki . . . Boye, Ndeko Scism alobaki: “Boye nde!” Ya solo, na ntembe te, yango emonanaki lokola likambo ya ba-Unitaire, na boye andimaki yango mpenza.

208 Bongo, nalobaki: “Boye, awa, nalingi koloba na bino likambo moko, sikawa.” Bomoni? Nalobaki: “Sika nalingi kotalisa bino polele ete mibali oyo, bango mibale, balobaki ndenge moko.”

209 Sikawa, Matai alobaki: “Na Nkombo ya Tata.” Ezali solo? [Losambo balobi: “Amen.”—N.D.E.] Malamu. Pe Petelo alobaki: “Na Nkombo na Nkolo.” Matai 28:19 elobi: “Na nkombo ya Tata,” pe Misala 2:38 elobi: “Na Nkombo na Nkolo.” Dawidi alobaki: “Nkolo alobaki na Nkolo na ngai.” Ezalaki Nani? Tata pe Nkolo ezali Nkombo moko. Dawidi alobaki: “Nkolo alobaki na Nkolo na ngai: ‘Fanda na loboko na Ngai ya mobali.’” Bomoni: “Na Nkombo ya Tata; na Nkombo ya Nkolo.”

210 Pe Matai alobaki: “Na Nkombo na Mwana,” pe Petelo alobaki: “Na Nkombo na Yesu.” Nani nde Mwana? Yesu.

211 “Na Nkombo ya Molimo Mosantu,” ezalaki nde Matai; pe Petelo alobaki: “Na Nkombo na Klisto,” Logos.

212 *Tata, Mwana, Molimo Mosantu*: “Nkolo Yesu Klisto.” Kasi, yango ebongi mpenza be na ndenge ekoki. Bomoni?

213 Ndeko Scism alobaki na ngai, to, Ndeko Scism, ndeko mobali oyo ya Unitaire, alobaki: “Ndeko Branham, ezali ya solo, kasi,” alobaki, “oyo wana ezali *oyo*.”

214 Nalobaki: “Boye, oyo ezali *oyo wana*.” Ya solo. Bomoni? Nalobaki: “Soki oyo wana ezali *oyo*, oyo ezali *oyo wana*. Bongo mpo na nini bozali kowelana?”

215 Nalobaki: “Bótika ngai nápesa bino toli, bandeko. Soki nasengeli kobatisa moto, bótala ndenge. . .”

216 Nalobaki: “Sikawa, Dr. Ness ye oyo.” Pe o . . . eleki mwa ntango, moto moko kati na bino bandeko, alobaki, ete boyebi Docteur Ness.

217 Ee, awa, nakoloba, Ndeko Hicks oyo, azali na . . . Nakanisi ete ozali na Diplome ya Doctorat. Ezali bongo? Malamu.

218 Bongo, nalobaki: “Soki Dr. Ness, oyo afandi awa. . .” Pe nalobaki: “Soki nalingaki. . .” Sikawa ntango namemaka moto na mai, mpo na kobatisa ye, nasosolaka yango kaka lokola ye, nalobaki: “Oyo wana ezalaki bibiangelo oyo elongobanaki na Nkombo na Ye.”

219 Nalobaki: “Sikawa, bandeko ya ba-Assemblée bazali kosalela bibiangelo, pe bandeko ya Unitaire bazali kosalela Nkombo.” Nalobaki: “Sikawa, nakotalisa bino, ete bino mibale bozali na libunga, pe ngai nde nalongi.” Boyebi ndenge bosengeli ko . . . Soki bato bakomi na motema likolo-likolo ndenge wana, osengeli kosekisa bango mwa moke, mpo na kokitisa bango motema mwa moke. Bongo nalobaki: “Nakotalisa bino ete bino mibale bozali na libunga, pe ngai nde nalongi.”

220 Nalobaki: “Sikawa, soki nazalaki na mposa ya komemia Ndeko Ness, nalingaki koloba. . .”

221 To, to Ndeko Hicks oyo, bomoni. Nalingaki koloba: “Hicks!” Sikawa, oyo wana elingaki kozala malamumu? Te. Ee, bongo soki nalobi: “Docteur! Eh, Doc! Ndenge nini?” Sikawa, wana, ezali kozanga limemia, boye te?

222 “Ntango,” nalobaki, “lolenge wana nde bino ba-Assemblée, bosalaka, bomoni. Ntango bino bandeko ya ba-Assemblée, bolobaka: ‘Na nkombo ya Tata, pe ya Mwana, pe ya Molimo Mosantu,’ bolobaka nde, ‘na nkombo ya reverend, docteur.’”

223 Pe nalobaki: “Bongo, bino bandeko ya Unitaire, ntango bobatisaka, bolobaka: ‘Yesu!’” Bango basalelaka te . . .

224 Bango, ba-Jesus Seul, basalelaka bobele nkombo “Yesu.” Ba-Yesu bazali ebele. Kasi, Ezali Nkolo Yesu Klisto, bomoni. Bazali ebele . . . Kobatisa na nkombo na “Yesu,” na ntembe te, nandimaka yango te; Likomi ezali te. Bózua oyo ya ebandeli, bótala soki ezali te “Nkolo Yesu Klisto.” Na ntembe te, Azali Nkolo Yesu Klisto. Ba-Yesu bazali ebele, na ntembe te. Pe *Klisto* ezali “Mopakolami.”

225 Nalobaki: “Sikawa, soki nálingaka koloba likambo moko yango na ndeko Ness. Nakokaki koloba, ekozala malamumu mpo na ngai koloba: ‘Eh, Ness!’?” Nalobaki: “Ndenge wana nde bino ba-Unitaire bolingaki koloba yango. Bomoni? Wana elingaki kozala mpenza kozanga limemia epai na mobali wana oyo atángá, pe azali na Diplome ya Doctorat, boye te? Soki atángá mingi mpo na kozua yango, esengeli ápesama lopété wana.”

226 Pe nalobaki: “Bongo soki nalobaki: ‘Eh, Doc!’” Nalobaki: “Ekoyokana lokola kozanga botósi, mpo na motei koloba na moninga motei ndenge wana, boye te?” To, nalobaki: “Ndenge wana nde bino bosalaka yango, kasi bobele na lolenge ya bibiangelo.”

227 Kasi nalobaki: “Ntango namemaka moto na mai; nakopusana wana pe nakotuna ye, pe nakoloba, pe nakotuna nkombo na ye pe nani ye azali, pe kondima na ye.”

228 “Bongo nde nakobondela, pe nalobi: ‘Sikawa, Tata, ndenge Otindaki biso “kokende na mokili mobimba pe kozalisa bayekoli na mabota nyonso. . . .”’” Bino bandeko, boyebi ete yango nde oyo ya ebandeli, bomoni. ““ . . . kozalisa bayekoli na mabota nyonso, kobatisa bango na Nkombo ya Tata, pe ya Mwana, pe ya Molimo Mosantu; kolakisa bango ete bátosa nyonso esili Yo. . . . nyonso oyo esili Yo kolakisa biso.”’”

229 “Na sima, nalobi: ‘Likolo na eyambweli ya kondima na yo; likolo na eyamboli ya masumu na yo, pe ya kondima na yo na Mwana na Nzambe, nazali kobatisa yo, ndeko na ngai molingami, na Nkombo na Nkolo Yesu Klisto.’”

230 Nalobaki: “Lolenge wana nde ngai nabatisaka. Nandimaka mbala moko bibiangelo na Ye, oyo Ye azalaki, mbala moko Tata,

Mwana, pe Molimo Mosantu. Pe ntina oyo Yesu alobaki bongo, ezalaki . . .”

<sup>231</sup> Sikawa, bótala. Soki—soki ezali bongo te, bozali na kotelemelana kati na Makomi na bino; bozali na kotelemelana. Bongo bokosala nini ntango. . . Bongo soki ndeko wana ya Buddhiste atelemaki mpo na koloba: “Olobi nini mpo na likambo *oyo*?” Bango balingaki koloba nini ntango balobaki na ngai. . .

<sup>232</sup> Kuna, ntango ndeko Indien wana abetaki mǒndengé ná Morris Reedhead, alobaki na ye, alobaki: “Olobi nini mpo na Malako 16?” Asengelaki komibenda na likambo yango.

<sup>233</sup> Ozali na ntina ya komibenda na likambo moko te. Ezali Liloba na Nzambe. Kangama na Yango. Bondela kaka. Zua emoniseli. Nyonso ezali kotambola elongo ndenge moko.

<sup>234</sup> Bomoni, sikawa, bango mibale bazalaki koloba likambo yango; bibiangelo te; na polele te. Nalobaki: “Sikawa. . .”

<sup>235</sup> Nandimeli Ye. Azalaki Tata; Nzambe mosusu te. Azalaki Mwana; Nzambe mosusu te. Nzambe moko yango! Bino. . . Ezali nde misala misato. Nzambe kati na eleko ya Botata, soki bolingi kobenga yango bongo, ya Botata; ya Bomwana; pe ezali bobele Nzambe moko yango kati na biso sikawa, “Ngai nakozala elongo na bino.” “Ngai,” likitani bomei, “Ngai nakozala elongo na bino.” Boye, bomoni, ezali misala misato, Banzambe misato te.

Sikawa, ndeko, soki bayekoli basalelaki yango te, pe bongo na bongo. . .

<sup>236</sup> Nalobi likambo moko te ya kotelemela yango. Ezali na yango mabe te. Nalobi, soki moto moko ayei awa, oyo azuaki libatizi na nkombo ya “Folólo ya Saron, Lísí ya Lobwaku, pe Monzoto ya Ntongo,” pe andimeli Yesu Klisto lokola Mobikisi na ye; nakoloba: “Nzambe apambola yo, ndeko! Yaka, tokende!” Bomoni? Ya solo. Mpamba te, soki motema na yo ezali sembo te, ozali pe na bosembo te, ata bongo. Ya solo mpenza. Pe motema na yo—na yo esengeli kozala sembo.

<sup>237</sup> Pe nalobaki: “Sikawa bótala. Sikawa, soki nalingi kopesa Ndeko Ness mbote awa, nakoloba ‘Rev. Dr. Ness.’ Ya solo mpenza. Azali motei. Basengeli kozua ye lokola moto na lokumu. Atángá, pe atángá mingi. Azali na Diplome ya Doctorat, na bongo basengeli kobenga ye ‘docteur’. Yango nde ebiangelo na ye, bomoni. Pe ata bongo, nkombo na ye ‘Ness’. Kasi nakoloba te: ‘Eh, Ness! Eh, Doc!’ Te, wana ekozala malamú te. Nakoloba: ‘Rev. Dr. Ness.’

<sup>238</sup> “Bomoni, yango nde nazali kolobela, bomoni, oyo Ye azali; na mbala moko Tata, Mwana, pe Molimo Mosantu, ‘Nkolo Yesu Klisto.’” Bomoni?

<sup>239</sup> Pe nalobaki: “Soki nakotikáláká kobatiza mondimi moko ya ba-losambo na bino, nde ndenge wana nakobatiza.” Nalobaki: “Okoyamba ye, Ndeko Ness?”

240 Alobaki: “Na ntembe te. Abatisami na Nkombo ya Tata, Mwana, pe Molimo Mosantu.”

Nalobaki: “Okoyamba ye, Ndeko Scism?”

Alobaki: “Na ntembe te, abatisami na Nkombo na Yesu.”

241 Nalobaki: “Bongo, likambo nini ná bino, bandeko? Mpo na nini bozondima yango te, mpo na kobuka bitutu oyo, epai oyo bato wana bazali . . . ? Ba-Unitaire bazali na mposa, mpenza, ba-losambo na bango, bazali na mposa ya kosambela elongo na baoyo ya ba-Assembée. Pe ba-Assemblée, losambo na bango, bazali na mposa ya kosambela elongo na ba-Unitaire. Ndenge wana pe ná bandeko. Bango bazali ndenge wana. Kasi na ntango nyonso oyo zabolo akoki kobundisa bango . . . ”

242 Sikawa, bomoni oyo nalingi koloba, bandeko? Nazali kolanda ntina bobele moko, Yesu Klisto, pe bomoko ya Nzoto na Yesu Klisto. Yango nde ntina nazali kolanda. [Losambo balobi: “Amen.”—N.D.E.]

243 Sikawa, nalobeli te likambo ya: “Eh, soki ozui libatisi na Nkombo na Yesu te; okokende na lifelo.” Oyo wana, ezali bolema.

244 Nakoyebisa bino likambo oyo esalemaki mokolo wana. Nazalaki na Texas. Liboso nálongwa . . . Pe ba—bandeko oyo bazali banzeneneke na likambo yango. Lingomba ya ba-Unitaire, ba-losambo ntuku nsambo na mibale, bapesaki misolo mpo na kosunga liyangani na ngai. Pe nafandisaki Ndeko Petty, ndeko oyo ya ba-Assemblée de Dieu, na etumbelo na mpokwa wana. Sikawa, boyebi ete ezali ya solo. Azali ndeko moko ya motuya, Ndeko Petty, soki bamosusu kati na bino bayebi ye, ya Beaumont, na Texas. Azali moko na bato ya malamau koleka oyo nakútáná na bango. Mwasi na ye azali mo-Katoliko abongola motema, mwasi mosantu mpenza. Ye mobali azali mpenza moto na Nzambe.

245 Bóyebisa ngai nani azali moto malamau koleka Roy Wead, ya ba-Assemblée de Dieu. Bótangela ngai moko na bato oyo, bótala awa, bandeko nyonso oyo nayebi awa. Ndeko oyo ya lingomba ya Philadelphie, ná bato ya ba-Assemblée de Dieu, pe, banani bazali bato malamau koleka bango? Bóyebisa ngai bazali wapi. Boyebisa ngai nani azali malamau koleka Jack Moore? Bóyebisa ngai. Azali oyo babengaka . . . Bazali bato na bango. Azali moto ya kolekisa ndelo te. Na ngambo nyonso mibale, moto ya kolekisa ndelo azalaka; baoyo wana nde bato balakisaka misapi, na oyo wana nde zabolo pe alakisaka mosapi.

246 Kasi bango nyonso bazali bato na Nzambe. Nzambe apesi bango Molimo Mosantu. Soki ézalaka mpo na ngolu na Nzambe te, nde mawa mpo na biso nyonso, ná kowelana na biso pe makambo mosusu. Ya solo mpenza. Kasi ngolu na Nzambe esangisi biso. Kokamwa te ete tokoki koyemba: “Ekanganelo oyo



esangisi mitema na biso kati na bolingo na Klisto épambolama.” Boye, wana nde likambo oyo tosengeli na yango.

247 Na bongo, boyebi nini? Moyangeli Mokonzi ya li—lingomba, abengaki ngai, pe alobaki: “Oyebi likambo oyo osalaki lobi na mpokwa?” Na mpokwa ya mibale oyo nazalaki kuna.

Nalobaki: “Nini?” Nalobaki: “Liyangani ezalaki malamumu mpenza.”

Alobaki: “Na eteyelo na yo, obengisaki mobali moko ya mosumuki.”

Nalobaki: “Nayebaki yango te.” Ezalaki epai . . .

Alobaki: “Misie Petty wana.”

248 “Oh,” nalobaki, “mosumuki? Nini?” Nalobaki: “Azali motei ya ba-Assemblée de Dieu, ndeko.”

249 Alobaki: “Iyo, kasi azali kaka mosumuki ata bongo, mpo azui libatisi na ndenge oyo esengeli te.”

250 Pe nalobaki: “Ndeko, nasengi yo óyebisa ngai mpo na nini.” Nalobaki: “Azali na Molimo Mosantu.”

251 Alobaki: “Ndeko Branham, Petelo alobaki nini? ‘Bóbongola mitema, pe bóbatisama na Nkombo na Yesu Klisto mpo na kolimbisama na masumu na bino.’ Boye, masumu ya moto ekoki kolimbisama te soki naino azui libatisi na Nkombo na Yesu te.”

Nalobaki: “Esalemaka nde bongo, ndeko na ngai?”

Alobaki: “Esalemaka bongo.”

252 Nalobaki: “Boye, Nzambe abúlunganisaki mwango na Ye Moko, na Misala 10:49, mpamba te: ‘Wana ezalaki Petelo koloba makambo oyo, Molimo Mosantu akitaki likolo na baoyo bazalaki koyoka Liloba,’ bomoni, kasi bazuaki naino ata libatisi te. Boye, Nzambe apesaki Molimo Mosantu na baoyo babongwanaki ata te?” Nalobaki: “Na bongo otelemi mpenza wapi sikawa?”

253 Alobaki: “Oyebi eloko nini tokosala?” Alobaki: “Tozali kosala mwa zolongano, pe tokotia yo libanda na libungutulu na biso.”

254 “Bongo,” nalobaki, “ngai nakosala mosusu, pe nakozongisa bino na kati.” Nalobaki: “Bokoki kotia ngai libanda te, mpo nalingaka bino. Bomoni, bokoki kosala bongo te.” Nalobaki: “Ezali na bandeko na bino—na bino mingi mpenza kuna, oyo balingaka ngai pe bandimelaka ngai.” Nalobaki: “Bino, nako—nako . . . Bakoya, ata bongo.” Nalobaki: “Bakoya. Pe bokoki kotia ngai libanda te. Soki botii ngai libanda, ngai nakozongisa bino na kati.” Nalobaki: “Soki bosali zolongano moko; Nzambe, na ngolu na Ye, akopesa ngai nzela ya kosala mosusu, pe nakobenda bino bózonga na kati lisusu.” Ya solo, kozongisa bango na kati lisusu.

255 Pe, ndeko, oh, na Nkombo na Klisto, tika ete náloba likambo oyo. Na—nazali na . . . Nayebi ete nazui ntango molai awa; pe

ekómi pene na ngonga ya kosukisa, nabanzi, kasi bótika ete náloba likambo oyo, bomoni.

<sup>256</sup> Pe nalobaki na mobali wana, nalobaki: “Nakoyokana na yo, na ntango nyonso oyo okoteya Makomi, pe ozali na bolingo, pe okondima ete—ete. . . pe okoteya pe okoloba ete ozali kobatisa bato. . . na nkombo na ‘Yesu’ te, Yesu kaka. Te, misie. Na—nakondima oyo wana te, mpo nayebani na ba Yesu ebele; nayebi bango na Afrika pe na bisika ndenge na ndenge, bato na nkombo Yesu. Kasi soki okosalela nkombo ya ‘Nkolo Yesu Klisto,’ wana, nakoyokana na yo. Ezali malamú mpenza. Nakotelema elongo ná yo. Nakanisi bosengeli liboso kotia ‘Tata, Mwana, pe Molimo Mosantu,’ bomoni, mpo ézala polele.” Nalobaki: “Nakanisi ete bosengeli kosala bongo.”

Kasi alobaki: “Oh, te, te! Wana, ezongi na bosato bosantu.”

Nalobaki: “Ezali bosato bosantu te. Ezali Nzambe moko na misala misato.”

<sup>257</sup> Ezali bosato te, Banzambe misato. Tozali na Banzambe misato te. Ata moke te. Likambo ya boye ezalaka te. Eteyámá na Biblia te. Pe Nzambe azali bobele moko. “Yoka, E Yisraele, Nazali Yawe Nzambe na yo.” Nzambe moko! Mobeko ya liboso: “Okozala na banzambe mosusu liboso na Ngai te.” Na ntembe te, Azali Nzambe bobele moko, misato te.

<sup>258</sup> Oyo wana ezali ndimbola ya ba-Katoliko; pe eutaki na ba-Katoliko pe elekaki epai na ba-Lutherien, pe ekobaki, pe bongo na bongo, pe bato mingi bakómi kondima lelo ete tozali na Banzambe misato.

<sup>259</sup> Pe na esika wana nde, bokotikáláká te ko. . .Nsango Malamú oyo ekosimba ata moke te epai na Bayuda. . .Yango nde nasakolaki, mokolo wana na ntongo, epai ya ntoma moko ya Moyuda kuna. Okondimisa na Moyuda Nzambe ya bosato bosantu ata mokolo moko te. Okotikala kosala yango ata moke te. Kutu, azali te; ayebi yango malamú koleka. Bomoni, ayebi mingi oyo etali Biblia koleka oyo wana. Kasi Azali Nzambe misato ata moke te, mpo—mpo na Moyuda. Soki oyebisi ye ete Azali bobele Jehovah moko yango, akoyamba yango mbala moko. Ya solo! Ezali bongo, bomoni.

<sup>260</sup> Pe nandimaka nyonso oyo. Ndenge Yosefe alobaki: “Bandeko, bomisilikela te, mpo Nzambe moto asalaki yango,” bomoni. Mpamba te—mpamba te likambo oyo. . .Mpo likambo yango ézela kino ngonga oyo, esili, mpo eleko na biso bato ya Mabota ekómi mpenza pene na kosila. Pe, nandimaka yango, na motema na biso mobimba. Boye, bomoni, bandeko na ngai? [Losambo balobi: “Amen.”—N.D.É.] Nazali koluka kokóma na likambo moko, ete, etonga ya bato oyo, ya mibali oyo bazui libatisi ya Molimo Mosantu.

<sup>261</sup> Etonga ya Aimee McPherson, ye asalaki nini? Azalaki liboso mo-Unitaire, nabanzi; nde abimaki pe akómaki na ba-

Assemblée; na nsima, abimaki pe amisalelaki ebongiseli mosusu; kala mingi te, awa, akotisaki mwa eloko moko, na mwa etonga moko.

<sup>262</sup> Nazalaki na liyangani ya O.L. Jagers. Sikawa, biso nyonso toyebi O.L. Jagers. Tata na ye—na ye asungaki na kobandisa Conseil General ya ba-Assemblée de Dieu. Sikawa, O.L. azali moto monene. Azali motei monene. Nalobaki na ye, kala mingi te, nalobaki: “Ndeko Jagers, soki ngai nakokaki koteya lokola yo, nalingaki kosala ata liyangani moko te ya lobiko na nzoto.” Kasi azalaki na makambo wana ya makila pe vinyo, ná biloko wana, ntango abandaki liboso kuna.

<sup>263</sup> Bólimbisa ngai, soki nazali koyokisa bino mitema mpasi, bandeko, na likambo yango. Ngai—ngai...Ezali mabe te. Nzambe akoi kobimisa makila, kobimisa vinyo, to kobimisa mafuta, nyonso oyo Alingi, kasi yango elimbisaka masumu te. Te, misie. Te, misie. Te, ata moke te. “Makila na Yesu Klisto ekobungisa nguya na Yango mokolo moko te, kino ete Lingomba na Nzambe mobimba oyo esikolami ébikisama, mpo é sala lisusu masumu te.”

<sup>264</sup> Nalobaki: “Ndeko Jagers?” Namemaki ye; nabengaki ye na telefone. Pe nazalaki elongo ná Baklisto Bato na Mombongo. Pe nalobaki, nalobaki: “Ndeko O.L?”

<sup>265</sup> Alobaki: “Yo ozali wapi mpemza?” Nazalaki kuna, na mwa motel moko ya ntalo moke. Pe alobaki: “Olingi koloba na ngai ete bango nde batii yo kuna?”

<sup>266</sup> Nalobaki: “Yango nde mposa na ngai. Ntango nayaki epai na yo,” nalobaki, “osalaki nini? Otiaki ngai kuna, na Hotel Statler, pe esengelaki ete nátelema na coin. Bafandisaki ngai na mesa moko; nayebaki mbeli nini násalela te, to eloko mosusu te. Pe nazalaki te...Nakómaki kuna, nalataki kazaka te, balingaki bá bimisa ngai.” Pe nalobaki: “Na—nayebi ndenge ya komikamba te.”

Alobaki: “Nakomema yo kuna, soki bakoki kosala yango te mpo bazali babola mpenza.”

<sup>267</sup> Nalobaki: “Te, misie.” Nalobaki: “Eloko nalingi kosala ezali nde kolia mosuni ya ngombe elongo na yo, soki okolinga kofuta mpo na yango.”

Pe alobaki: “Nandimi.”

<sup>268</sup> Bongo, tokendeki esika moko, pe tofandaki. Nalobaki: “Ndeko Jagers, nasepelaka mpenza na oyo yo . . .”

<sup>269</sup> Pe azali moninga na ngai ya motema mpenza, ndeko ya motuya. Pe na—nazalaki na mwa buku na ye, pe ye . . .epai alobeli mwasi oyo autaki kokóma awa, kouta na mboka mopaya, oyo azalaki na makila na maboko na ye, pe nyonso wana. Boye nazalaki na yango wana. Nazalaki kaka na mposa ete awangana

yango mbala moko, pe, nazalaki na yango mpenza na lokasa oyo ye—oyo ye akomaki, boyebi.

<sup>270</sup> Nalobaki: “Namoni ete ozali kokende kaka liboso, ete obandi, ete okobandisa kolamuka monene.” Mpamba te, Bato na Mombongo nde babengaki ngai kuna, na ntembe te.

<sup>271</sup> Emonani lokola ete bato bakoyeba. Soki Molimo Mosantu akoki komonisa makambo likolo na eteyelo, Akoki koyebisa ngai makambo oyo ezali kosalema na bisika mosusu te, bandeko? [Losambo balobi: “Amen.”—N.D.E.]

<sup>272</sup> Nakoki koyebisa bino, liloba moko na moko, pe kotalisa yango na nzela na Ndeko Carlson, ná ndeko oyo. Nafandaki na liyangani, lobi, pe nayebisaki na bandeko oyo makambo oyo ekoleka awa na ntongo oyo. [Ndeko moko alobi: “Iyo, misie.”—N.D.E.] Ya solo. Solo mpenza. [“Amen.”] Bomoni? Mpamba te, Molimo Mosantu alamusaki ngai, pe alobaki: “Telemā pembeni na lininisa.” Natalaki na lininisa, pe Alakisaki ngai likambo oyo mpenza. Nalobaki: “Sikawa, bandeko. . .” [Ndeko moko alobi: “Ya solo.”] Nalakisaki bino yango, ezali mpenza solo. Yango oyo! Bomoni?

Ee, basengelaki koyeba yango.

<sup>273</sup> Awa, eleki ntango molai te, mobali moko atelemaki, awa na Chatauqua, pe alobaki: “Ndeko Branham azali mosakoli.” Ngai nalobaka te ete nazali mosakoli. Bomoni? Kasi alobaki: “Ndeko Branham azalaka mosakoli ntango azalaka na nse ya Molimo ya kososola makanisi, kasi,” alobaki, “oh, Mateyo na ye ezali mbondó. Bókeba na Yango.” Namilobelaki, moto atángá, áloba likambo ya boye?

<sup>274</sup> *Mosakoli* elingi koloba nini? “Molimboli ya Liloba na lolenge ya Bonzambe.” “Liloba na Nkolo eyaki epai na mosakoli,” bomoni. Kasi, kaka yango, ezali pe likambo ya koloba awa te.

<sup>275</sup> Kasi, ata bongo, Ndeko Jagers. Pe nalobaki, alobaki, oh. . . Nalobaki: “Namonaki likambo ya mwasi wana, oyo azali na makila na loboko.”

<sup>276</sup> “Oh,” alobaki, “Ndeko Branham, wana ezali likambo ya kokamwa oyo otikálá komona!”

<sup>277</sup> Nalobaki: “Ndeko Jagers, nalingaka yo. Ya liboso, nalingi ete ótia loboko na ngai na oyo ya yo. Tóloba ete tozali bandeko.”

Alobaki: “Solo mpenza. Likambo nini?”

<sup>278</sup> Nalobaki: “Yo ozali moko na batei ya nguya koleka oyo ngai nayebi. Ozali mpenza esalelo monene—monene ya Nzambe!”

<sup>279</sup> Alobaki: “Matondi, Ndeko Branham. Ozali na komikitisa mingi.”

<sup>280</sup> Nalobaki: “Nalobi yango te mpo na komikitisa. Nalobi yango mpo nandimi yango. Ozali mosali na Nzambe.” Kasi nalobaki: “Ndeko Jagers, soki bobele o. . . O—okei libanda mosika mingi;

ozali na ndanga moko te oyo ekoki kondimisa makambo oyo ozali koloba. Ozali kotia moboko . . .”

<sup>281</sup> Pe yango nde ezalaka kokoso ná bino bato mingi ya Assemblée de Dieu, ná bato mosusu, mpo na mayangani ya lobiko na nzoto. Nazali kopamela bino te. Makambo mingi ebéngamaka . . . Pe Tommy, oyo, azali ndeko malamumu, pe toyebi ndenge atele mi ngwi. Kasi makambo mingi mpenza, na ekólo, ebengamaka lobiko na nzoto uta na Nzambe, ékokamwisa te ete bóboya kosunga mayangani kati na engumba. Bayáka kobenda bato mbongo, pe bakei. Pe bango bazui nini? Bópesaka bato ata mwa eloko moke te, koleka oyo opesaka uta na etumbelo, uta na eteyelo na yo moko. Pe bolobi solo, bandeko. Nayebisi bino, bolobi solo. Kasi ezali lokola . . .

<sup>282</sup> Nazalaki kotanga lisolo ya Martin Luther. Elobami ete: “Ezalaki likambo ya kokamwa te ndenge Martin Luther atelemelaki lingomba Katoliko, pe alongaki yango.” Bosilá kotángá lisolo na ye. “Kasi ndenge Martin Luther amemamaki te na bilandá-landa nyonso oyo elandaki kolamuka na ye, yango nde ezalaki likambo ya kokamwa.”

<sup>283</sup> Pe ntango likambo ya kokamwa yango esili kosalema, bazángi kokatama ngenga balandaka, kaka ndenge esalemaki na Ezipito. Pe ekótisaka ntango nyonso mobulu na mboka. Toyebaka yango, ntango tokómaka kuna. Yango nde esalaki ete, Kóla átelema, pe Nzambe asengelaki kopanza yango. Kasi, bandeko, nazali kopamela bino te.

<sup>284</sup> Ndeko Jagers afandaki wana pe azalaki komeka koyebisa ngai ete Molimo Mosantu nde azalaki kosala yango. Pe alobaki . . . Pe nazalaki na yango, na kati ya zulunale na ye moko . . . Nalobaki: “Ndeko Jagers, sikawa,” nalobaki, “ngai nasúká na kelasi ya nsambo. Kasi yo ozali Docteur ya Likindo, pe otángá kelasi ya avoká. Okóli na lingomba ya kitoko, ya malamumu, ba-Assemblée de Dieu. Tata na yo asungaki na kobandisa kondima wana. Kasi yo ozali kotángua na yango, wana etali yo.” Kasi nalobaki: “Wana etali moto nyonso oyo alingi kosala bongo. Nakoki kotelemela yango te. Kasi soki ekómi likambo ya esalelo moko lokola yo, oyo okoki komema milimo nkoto na nkoto epai na Klisto, kotonga mosala na yo ya koteya likolo na kotúntuka.” Nalobaki: “Ndeko Jagers, soki otongi likonzi moko ndenge wana, soki ozali na eloko moko te ya kokotisa sembo na likambo yango, ekokweya nsima na mwa ntango. Pe osengeli kozala na Likomi mpo na makambo oyo ozali koloba.”

Alobaki: “Likomi ezali.”

Nalobaki: “Lakisa yango.”

<sup>285</sup> Alobaki: “Ee, Ndeko Branham,” alobaki, “Molimo Mosantu nde azali kosala yango.”

<sup>286</sup> Nalobaki: “Lakisa ngai Likomi esika oyo Yango elobi, ete Molimo Mosantu ebimisá makila na nzoto ya moto, pe bongo

na bongo, ndenge wana. Lakisa yango; mafuta kobima na nzoto na bango. Olobaki: 'Mafuta yango ezali mpo na lobiko na nzoto kouta na Nzambe.' Pe olobaki: 'Makila ya mwasi yango ezali lobiko ya mabota.'" Nalobaki: "Soki ezali bongo, boye likambo nini ekómeli Makila ya Yesu Klisto? Yango elongolaka. Pe nyonso oyo ekeseni na Yango, ezali kotelemela. Etelemeli Yango." Nalobaki: "Ekómi mateyo ya kotelemela Klisto."

"Oh," alobaki, "Ndeko Branham, mokolo moko okoyeba."

<sup>287</sup> Nalobaki: "Nazolikya ete nakoyeba bongo ata mokolo moko te. Sikawa, ndeko," nalobaki, "ngai nalingaka yo, pe ozali ndeko na ngai." Pe nalobaki: "Ndeko Jagers, okomata na etápe moko, oyo nsima na mwa ntango, okokoka lisusu kozonga nsima te. Zongela lingomba na yo, zonga pe kangama na Nsango Malamu." Pe nalobaki: "Kotonga yango likolo na kotúntuka te." Nalobaki: "Yango. . ."

<sup>288</sup> Sikawa azali na, akómi kobatisa mpo na Bomoi ya Seko, boyebi, "Ntango nyonso oyo ozali kobatisa, ozali kozonga elenge mwasi to mobali. Sikawa, yango eko. . . Okokufa (ata moke) te." Boye, yango, wana, akómi na suka ya etape yango sikawa; ná "ba-mbuma ya nkisi ya vitamine wana, oyo euti na Mer Morte." Bomoni? Kasi yango mpenza, ndeko, babandaka na mwa kotúntuka wana.

<sup>289</sup> Pe bino bato oyo bozali awa, oyo bozali na mangomba oyo, bozali kotika likambo ya ndenge wana ékota na engumba oyo, pe, boyebi, zabolo azali na mayele mabe, pe ye—ye awelaka kokóta na makambo ya ndenge wana. Akotisaka mobulu na yango. Pe a—asalaka ete bato bamemama na likambo yango, pe akokotisa mobulu kati na lingomba, ná makambo mosusu. Kasi ezali yango te.

<sup>290</sup> Sikawa, bótala. Ata soki ozali na elonga ndenge nini, tala likambo oyo tokweisami pe tozangi yango, bandeko na ngai. Sikawa, nalingi nasilisa, na maloba oyo. Etali te názala na elonga ndenge nini, natongami na Makomi ndenge nini, pe nayebi makambo ya Biblia ya Nzambe ndenge nini; soki nazali na Molimo ya Nzambe te, oyo ya bolingo, na motema na ngai, mpo na bato nyonso pe nyonso wana, boye nazali na libunga mpo na kobanda.

<sup>291</sup> Sikawa, Polo alobaki, na Bakolinti ya Liboso 13: "Ata nazali na boyebi, bomoni, pe nasosoli mabombami nyonso ya Nzambe, bomoni; na nyonso wana, malamu; kasi nazangi bolingo, nazali mpamba. Ata pe nalobi minoko ya bato pe ya banje," ezali oyo osololaka na yango na Nzambe, pe ntango nyonso, oyo ekoki kolimbolama te. "Ata nazali koloba minoko, minoko mpenza ya bato pe ya banje, kasi nazangi bolingo, kolinga, nakozua litomba moko te." Boye, soki nayebi mabombami nyonso ya Nzambe, pe nakoki kofungola yango pe—pe kosala ete nyonso etambola

na molongo, kasi nazangi bolingo, mosala na yango nini? Pe soki na . . .

<sup>292</sup> Yesu alobaki: “Na yango bato nyonso bakoyeba ete bozali bayekoli na Ngai, soki bozali na . . .” soki ba-Assemblée balingi ba-Unitaire, pe ba-Unitaire balingi ba-Assemblée, “soki bozali na bolingo, moko mpo na mosusu,” bózala na elónza to na libunga. Pe na ntango nyonso likambo oyo ozali kolanda ezali mabe, mposa pe ezali mabe, kutu, na ntango wana ozali na libunga mpo na kobanda. Boye te? [Losambo balobi: “Amen.”—N.D.E.] Bomoni, “Ata nazali koloba na minoko ya bato pe ya banje, kasi nazangi bolingo, nazali naino mpamba.” Mpamba te, Nzambe azali bolingo. Toyebi yango.

<sup>293</sup> Pe ngai nandimaka minoko na sika. Sikawa, moto moko alobaki: “Ndeko Branham andimaka ndangá ya liboso te.” Nakosepela kosembola likambo yango ná bino sikawa. Bomoni? Nakosepela koyebisa bino yango.

<sup>294</sup> Nandimaka ete ntango moto ayambi Klisto, azuaka eteni ya Molimo Mosantu. Mpamba te, Yesu alobaki, na Matai mo—mokapo ya 12, ya mokapo ya 5 pe ntuku mibale na— . . . molongo ya 24, Alobaki. Te, nabanzi ezali Yoane 5:24. Alobaki: “Ye oyo akoyoka Maloba na Ngai, pe akondima Ye oyo atindi Ngai, azali na Bomoi ya Seko.” Nzoka nde, lolenge ya Bomoi na Seko ezali bobele moko. “Pe akokóma na esambiseli te; kasi asili kolongwa na kufa pe koingela na Bomoi.”

<sup>295</sup> Sikawa, nandimaka ete moto moko te akoki komibenga na mosala; Nzambe nde asengeli kobenga ye. Pe soki Nzambe abengi ye mpenza . . . Pe ezali na bato mingi, toyebi, bandeko, oyo bamipesi mosala pe bakanisi ete Nzambe abengi bango, kasi bomoi na bango lobi-lobi . . . ekoyebana, ekomonana polele. Kasi soki Nzambe abengi yo, ee, ozali, okozala wana, pe okotikala wana, bomoni, boyebi. Na bongo soki . . . Sikawa, oyo wana ezali mateyo ya ba-Batiste te. Boyebi yango, bomoni.

<sup>296</sup> Kasi, nandimaka te likambo ya kopesana mbote ya maboko mpo moto ázua kimia ya Seko, ná makambo nyonso wana. Na—nandimaka yango te, ata moke te. Soki balingi kondima yango, ee, ezali na yango mabe te. Nabengaka bango kaka bandeko na ngai.

<sup>297</sup> Na ntongo oyo, soki nakokaki kosenga eteni ya gató (ekómi pe pene na ngonga ya bilei ya mpokwa), nakoki kosepela na oyo batiá seríze, pe yo okoki kozua oyo batiá póme, kasi biso mibale tozali kolia gató. Bomoni? Boye, bokeseni ezali te . . . na ntango nyonso oyo biso tozali kolia gató.

<sup>298</sup> Tondimaka nde ndenge wana. Soki olingi kozala moto ya Unitaire, zalá moto ya Unitaire; soki olingi kozala moto ya Assemblée de Dieu, zalá moto ya Assemblée de Dieu. Soki olingi kozala oyo nyonso ozali, Batiste, Presbiterien, zála Moklisto kati na yango. Bomoni?

299 Pe—pe lukaluka yango yo moko, kasi bówelana kati na bino te. Mpamba te, makambo mike-mike oyo, nyonso esimbanaka malamau kati na yango. Ya solo. Yango nyonso esimbanaka malamau pe ekutanaka na esika moko wana.

300 Pe—pe atako tosali nini, bikamwiseli boni tokoki kosala, bangomba boni tokoki kolongola, to eloko soko nini; kino tókóma naino na mosanda ya kolinga, ya komekola te, kasi tólingana bamoko na bamosusu. Na ntango tolingi ndeko nyonso, etali te soki asambelaka wapi, tolingi ye; kaka na koloba te ete tolingi ye, mpo toyebi ete ezali likanisi ya basambeli, ete: “Totindami kosala bongo.” Kasi, mpo ete tozali kosala yango, tolingani bamoko na basusu; na bongo, na motema molai, koyikana mpiko bamoko na basusu.

301 Pe nandimaka, na Bakolose 3, pene na 9, na esika moko wana . . . Nakoki, na—nazangi . . . Ntango mosusu nabosani esika ya Likomi yango, kasi Elobi boye. Sima na biso kokóma Moklisto, tosengeli kozala na kolula te. Bomoni? Tokoki kozala na kondima te soki tozali komeka kopesana limemia pe kotosana bamoko na bamosusu. Bomoni, tokoki kosala bongo te; tokoki kozala na kondima te. Tosengeli komemya Nzambe, bomoni, komemya Ye. Kondimela bandeko na ngai, na ntembe te, ezali bolingo; kasi limemia pe lokumu ézóngaka nde epai na Nzambe! Na oyo etali . . . Kasi bózalaka na kondima pe bótiaka motema bamoko na bamosusu. “Kasi bóbukanaka lokuta te.” Bomoni? “Bóbukanaka lokuta te.” Soki na ntongo oyo nalobi na yo: “Nalingi yo,” Yango esengeli koloba yango mpenza. Soki te, nazali moto ya bilongi mibale. Ya solo mpenza.

302 Sikawa, bandeko, kaka na likanisi yango . . . Sikawa, Ndeko Tommy, nabanzi ete naumeli mingi te, awa. Ngai . . . Ndeko Tommy azali na likambo ya koloba na mwa ntango moke. Kasi nakoki koloba boye, ntango nayaki epai na bino . . .

303 Ngai nandimaka boye. Nandimaka ete Nzambe Tata na biso azipaki mongondo moko na nkombo Maria na elili na Ye, pe Akelaki momboto ya Makila kati na ye, yango nde ebotaki Yesu Klisto, oyo azalaki Mwana na Nzambe, mongombo oyo Nzambe amibombaki kati na yango, na mosuni, pe amimonisaki Ye moko katikati na biso. “Nzambe azalaki kati na Klisto, kozongisa bato ya mokili na bondeko ná Ye moko.” Nandimaka ete momboto ya Makila yango epasukaki na Gologota, mpo na kolimbisama ya masumu na biso. Pe Molimo abimaki kati na Ye pe azongaki likolo na Lingomba, mpamba te, Klisto, Molimo Mosantu; Klisto, Logos, akómaki sikawa kati na biso, Molimo Mosantu, na nzela na libatisi. Kokómisa biso . . . Klisto amikabolaki Ye moko, Apesaki Bomoi na Ye na moko moko na biso, ete biso, lokola etonga na bato, tókóma Lingomba na Nzambe. Pe eumeli te . . .



<sup>304</sup> Nazaláká na momesano ya kotambola na mpunda. Boyebi yango. Tata na ngai azalaki kotambola na mpunda, ya solosolo. Nazalaki kotambola na mpunda. Tozaláká kokamba bitonga ya—ya . . . na Vallée ya Arapaho, to nalingaki koloba, na Ebale ya Troublesome, na ngambo ya ba-Ngomba ya Arapaho. Lisanga ya Hereford nde ebokolaka bibwele na lobwaku wana. Pe na lobwaku yango, babokoli ngombe yango, ba—bazali na matiti mingi oyo bango moko balonaka. Pe soki elanga moko ekoki kobimisa ata nkoto moko ya matiti, okoki komema ngombe na—na matiti yango, kuna na nse ya Parc Estes, pe okoki komema ngombe na ma- . . . Bisika na ngai ya bokila mingi, ezalaka kuna. Pe nasalá mosala ya kobokola ngombe kuna mpo na mobu. Nakendaka kaka, na eleko ya Printemps pe ya Automne, soki nazali na mosala te pe soki nakoki, nasangisaka bibwele, kaka mpo názala kuna, mpo nasepelaka kotambola na mpunda. Pe komata kokita bisika nyonso na ela- . . . lobwaku yango, ezali na ndambo ya babokoli ngombe oyo bazali na ndingisa ya kokota kuna, pe koleisa bibwele na bango. Pe na eleko ya Printemps, mbala mingi, nasila kosunga bango mpo na kosangisa bibwele na bango pe kokamba bango kuna.

<sup>305</sup> Pe batongá lopango ya bibwele, mpo bákoka kozonga na mabele ya bato te, ntango bazali koleka na bilanga ya matiti. Kino . . . Pe mobateli bibwele atele mi wana, azali kotanga bibwele yango ntango azali kokota, ntango bazali kokota. Pe nafándá, mikolo ebele, ngonga moko sima na mosusu; kotala ndenge baoyo ya M. Grimes bazokota, ye azalaki na ba-Diamond Bar; baoyo ya biso bazalaki ba-Turkey Track; pe na nse na biso, bazalaki na—na ba-Tripod; ná baoyo ya Jeffrey, pe bongo na bongo. Na sima, ntango natii lokolo likolo na ebonga ya mpunda, ndenge mingi kati na bino boyebi, nakofanda wana mpo na kotala mobateli bibwele yango, ndenge atele mi wana, wana ákotanga bibwele yango.

<sup>306</sup> Namonaki eloko moko. Azalaki kotia bokebi mingi te na elembo oyo ezalaki na lopo na ye. Kasi ezalaki na eloko moko oyo ye azalaki koluka mpenza, yango ezalaki elembo ya makila. Esengelaki kozala ya libota mpenza ya Hereford, soki te ekokaki pe kokota na lopango wana te, kasi elembo na lopo na ezalaki kosala bokeseni mpenza te.

<sup>307</sup> Nakanisi ekozala pe bongo na Esambiseli. Akotala bilembo na lopo na biso te, kasi Akoluka nde elembo ya Makila.

<sup>308</sup> Nasalá mabunga, bandeko, pe nasalá makambo mingi ya mabe. Pe soki namemá eloko moko boye na kotambola na biso elongo, to boyóká likambo moko boye oyo nalobélá to nalóbá, oyo ekoki kobetisa libaku na lolenge moko boye, to soki nalobaki likambo moko na ntongo oyo, oyo ekoki kobetisa libaku, nasengi na yo, lokola ndeko mobali to ndeko mwasi Moklisto, limbisa ngai. Nakani kosala bongo te. Nafungoleli bino kaka motema, mpo tóyeba.

309 Soki mosala ya kobatisa ezali, bino bandeko bósala yango, bino moko, bomoni. Ezali, ngai na—nakosala te. Soki nasengelaki, ndenge wana nde nalingaki kobatisa bato, na lolenge wana. Pe bino nyonso mibale bokoki kondima yango, bomoni. Boye, bokoki kozua moto yango, bazui libatisi na Nkombo ya Tata, Mwana, pe Molimo Mosantu, bazui pe libatisi na Nkombo na Nkolo Yesu Klisto. Boye soki mokolo moko nabatisi moto. . . kasi nasali yango naino te. Nabatisaka bobele na losambo na ngai moko, pe kaka bato ya kuna. Pe bato ya losambo na ngai bazuaka libatisi ndenge wana. Pe soki obwaki miso na nsima, yango nde lolenge ba-Missionnaire ya kala bazalaki kosala, lolenge ba-Missionnaire Batiste ya kala bazalaki kosala. Pe sikawa, soki. . . Ezali bongo.

310 Ngai nandimaka lobiko na nzoto kouta na Nzambe. Nandimaka libatisi ya Molimo Mosantu. Nandimaka ete—ete Molimo Mosantu alobaka minoko na sika. Nandimaka makabo nyonso oyo Nzambe apésá na Lingomba na Ye. Nandimaka yango, mokama likolo na mokama. Kasi nandimaka. . .

311 Nandimaka mpenza te ba-lobiko na nzoto ya káfúkafu oyo tozali na yango mikolo oyo. Nakolinga kobenda bokebi moko awa. Eleki mwa ntango, ezalaki na ndeko mobali moko. . . Ezali Ndeko na ngai ya motuya Tommy Hicks te, oyo ngai nazuaka ye mpenza mosali ya Klisto. Ezalaki na moto moko na ekólo mosusu, pe na ekólo yango, ezalaki na. . . Azalaki ntango nyonso koloba: “Mobikisi ya káfúkafu ya Nzambe! Mobikisi ya káfúkafu,” boyebi, ndenge wana.

312 Pe nayambaki mokanda moko sima na moto yango ko. . . kouta na lingomba ya ba-Lutherien. Pe sekretere na ngai oyo ayebi ete tozali na yango kati na mikanda na biso. Nakotanga nkombo ya moto yango te, mpo ezali lolenge ya Boklisto te. Atako nandimaka makambo lokola mobali yango te, kasi ezali mpenza na molongo. Nalingaka ye. Azali ndeko na ngai.

313 Kasi ekómaki na esika moko, oyo basengeli kaka kozala na eloko moko ya káfúkafu, to ya komemama, to eloko mosusu ya ndenge wana, bomoni. Pe, oyo wana, ezali na ntina moko te, bomoni. Ndeko. . . “Kokembisa ya nzoto epesaka litomba moke mpenza.”

314 Na bongo motei ya Lutherien oyo ayanolaki motei yango na mo—mo—mokanda. Pe alobaki: “Bino ba-Evangeliste ya Amerika oyo boyaka awa,” alobaki, “ná makambo na bino ya lobiko na nzoto ya kafúkafu, mpo na bato nyonso!”

315 Sikawa emonani lokola nazali komipesa longonya, kasi Nzambe ayebi ete nazali na likanisi wana te. “Kasi,” alobaki, “ntango—ntango mwana oyo Deborah Stadskev akufaki, bebé wana, pe mama na ye atelemaki wana, mokolo wana, na India-. . . na Californie, esika bebé yango akufaki, ná nzoto ekómaki mpio. Pe amonaki. . . atiaki bebé yango na maboko ya

Ndeko Branham, pe ye atelemaki wana pe abondelaki mpo na bebé yango. Pe bebé yango abandaki koganga pe koningana; pe azongiselaki ye bebé yango.”

<sup>316</sup> Ayebaki pe likambo oyo ya Mexique. Oyo, tokoki kondimela litatoli ya ba-Hommes d’Affaire Du Plein Evangile. Esengeli kozala na eloko oyo etatolami na monganga. Ntango mwa bebé wana ya Mexicain akufaki na ntongo wana, na ngonga ya libwa, pe ekómaki ngonga ya zomi na moko na butu. Monganga akomaki mokanda na ye ya litatoli. Ndeko Espinoza, oyo mingi kati na bino, bandeko ya ba-Assemblée de Dieu boyebi ye, ye moto akendeki kozua mokanda yango epai na monganga, ete akufaki.

<sup>317</sup> Pe namonaki emononeli, likolo na ebele na bato; ntango ba-Katoliko nkoto ntuku mibale bayaki epai na Klisto, na engumba ya Mexico. Nalobaki: “Bózua yango te. Nayebi te, bebé yango. . . Nauti komona emononeli awa.”

<sup>318</sup> Pe Billy azalaki wana, azalaki komeka, ná basungi ntuku misato to ntuku minei, bazalaki kokoka te kopekisa mwasi wana kokota na molongo ya mabondeli, ná bebé yango. Azalaki kokota na kati na makolo na bango, pe nyonso. Boye, sukasuka, natindaki Ndeko Jack Moore. Nalobaki: “Kende kobondela mpo na mwana wana.”

<sup>319</sup> Natalaki boye, namonaki mwa bebé moko ya Mexicain azali koseka. Nalobaki: “Zela moke. Bóya na ye awa.” Bomoni? Pe ntango natiaki maboko likolo ya bulangíti wana. . . Mbula makasi ebetaki, mokolo mobimba. Pe bazalaki wana banda na ntongo ntongo ya mokolo yango, pe ekómaki pene na ngonga ya zomi na moko na butu wana. Natiaki maboko na ngai likolo na mwa bebé yango. Abandaki koningana pe kolobaloba. Pe bango babandaki koganga.

<sup>320</sup> Bongo, na sima bakitaki na ye pe bakendeki kozua mokanda ya litatoli. Bakendeki epai na monganga, pe monganga alobaki: “Natatolaki ete bebé yango akufaki, na ntongo ya lelo, na ngonga ya libwa. Akufaki na maladi ya mpanzi.” Bomoni? Na bongo makambo yango ezali—ezali—ezali solo. Etatolami na mikanda. Esengeli kozala bongo.

<sup>321</sup> Tosengeli ntango nyonso kozala na bosembo pe na solo na makambo nyonso. Bókómisa yango te. . . Bótika yango ézala kaka oyo yango ezali. Bótika yango. . . Nzambe azali na bosenga ya lisungi na likambo ata moko te. Bomoni, Ye—Ye—Ye azali Nzambe.

<sup>322</sup> Bongo sikawa alobaki boye: “Kasi ntango mama yango abengaki Ndeko Branham na Amerika, azalaki kolelela ye na telephone: ‘Yaka kosekwisa bebé na ngai!’ Pe guvenemá ya Etats Unis. . .”

323 Mobali na ye azali motei na Mampinga. Pe bino nyonso boyebi Julius, mingi kati na bino bayebi ye; akomaki buku na ngai ya: *Mosakoli Akei Kotala Afrika*.

324 Pe mwa mama yango, ya Norvegiene, azalaki koganga, na mongongo makasi, alobaki: “Ndeko Branham, nazalaki wana ntango bebé wana asekwaki!” Alobaki: “Tondimi ete yo ozali mosali na . . . ya Klisto.” Alobaki: “Yaka, kotielala bebé na ngai maboko, pe akobika.” Autaki kokufa, kala mingi te, na maladi ya mpanzi; abelaki pene na ngonga minei, to mitano.

325 Pe bato yango bazalaki wana, bazalaki kolela pe koganga, kopumbwa-pumbwa, koloba: “Nzambe akosekwisa ye! Nzambe akosekwisa ye!” Pe bazalaki koloba . . .

326 Mpo na yango, kompani ya American Air . . . to, kompani ya American Airlines te. Mapinga ya Etats Unis balingaki komema ngai kuna na mpépo ya moke, pe kozongisa ngai, na mokolo moko. Bomoni?

327 Pe nalobaki: “Liboso ete náya, bótika ngai náluka mokano na Nkolo.” Boye nabondelaki, mikolo mibale. Pe monganga yango azalaki na boboto mingi, atikaki ete bebé yango álala wana.

328 Bongo, na ntongo moko, nalamukaki pe nazalaki kokende na makusa. Natalaki, Pole moko etelemaki wana, na likolo, ya bonene moko lokola mwinda oyo kuna, ezalaki kozunguluka, elobaki: “Kosimba yango te. Kopámela yango te. Ezali loboko ya Nkolo.”

329 Nazongaki mbala moko pe nabengaki na ekólo yango, nabengaki pe nalobaki: “Na—nakoki koya te.”

330 Pe motei oyo ya Lutherien alobaki: “Mpo na nini bozelaka te kino ete bózua mokano mpenza kouta na Nzambe, lokola Ndeko Branham asalaki? Bongo nde bokoyeba eloko nini bozali kolobela!”

331 Sikawa, ezali bongo, bandeko, soki tokokaki bobele kotika kozua mikano ya nokinoki; pe kozela mpo na koyeba malamumu, mokano mpenza kouta na Nzambe.

332 Pe nyonso oyo, lobiko na nzoto ya basumuki oyo bayebi eloko moko te na oyo etali Nzambe. Ngai nandimaka ete lobiko na nzoto kouta na Nzambe etongami likolo na mobeko moko, ete osengeli liboso koya epai na Nzambe, kopesa Ye motema na yo, pe kosukola bomoi na bino na Makila na Yesu Klisto, bongo na sima Nzambe akobanda kosala ná yo pe akobikisa yo. Kaka ndenge ndeko mobali wana alobaki, mpo na mwasi oyo ye abondelaki mpo na ye kuna, mosantu ya Nzambe, bomoni.

333 Na bomoi na ngai, nasálá mabunga ebele. Nasálá makambo mingi oyo ezali malamumu te. Mbala mosusu, soki nabiki lisusu ntango molai, nakosala mosusu ebele. Mosusu kati na yango ntango mosusu ekozala mabanga ya libaku na nzela na bino. Nazali kolikia ete bokolimbisa ngai.

<sup>334</sup> Nazalaki kotanga lisolo ya Abraham, makambo oyo azangaki kolonga. Ndenge ye, oh la la, makambo oyo asalaki; atiaki ntembe na Nzambe; pe akosaki na ntina na mwasi na ye; pe nyonso wana. Kasi ntango Nzambe akomáki lisolo na ye na Baloma 4, mabunga na ye ekomámáki ata moke te, kasi elobaki: “Abraham atengatengaki ata moke te” na kozanga kondima . . . na Nzambe, “kasi ayikaki mpiko.” Mabunga na ye nyonso babosanaki yango nye, ntango Nzambe akomáki lisolo ya bomoi na ye. Mitungisi na ye elobamáki kutu te. Mabunga na ye elobamáki te.

<sup>335</sup> Boye, bandeko, nazolikia ete, ntango bakotángá lisolo na ngai Mokolo wana, Ye akolongola pe oyo ya ngai, pe akokanisa na ntina na yango lisusu te. Nazolikia ete ekozala pe bongo mpo na bino. Nzambe ápambola bino.

<sup>336</sup> [Ndeko Tommy Hicks apusani pene na micro mpo na koloba maloba oyo elandi—N.D.E.]

[Nabanzi ete tokoki koloba na ntongo oyo na ndenge ya bokuse nyonso oyo elobami, na maloba oyo: Klisto kati na ngai, elikya ya nkembo. Bóloba yango, nasengi bino. Klisto kati na ngai, elikya ya nkembo.]

[Na bomoi ya moto nyonso mikakatano ya ndenge na ndenge ezalaka. (Nakoteya te) Nazali na liteya. Nandimaka ete Moklisto nyonso asilá . . . ? . . . Yesu . . . ? . . . Motema na ngai esepeli na ntongo oyo, pe nandimi ete mpo na mingi kati na biso, makambo oyo etungisaka biso . . . ? . . . ekomisaka biso mibali pe basi ya Nzambe malamú koleka.]

[Babe Ruth ayebanaki lokola Mokonzi ya Homerun. Kasi boyebaki ete Babe Ruth azalaki pe Mokonzi ya Strikeout? Abetaki lokito mbala mingi koleka oyo atikála kokótisa mingété. Abetaki lokito mbala 1330; akotisaki bobele mingété 860. Kasi ntango nyonso Babe Ruth azalaki kobeta lokito, azalaki kozonga kofanda na banc de touche ntango arbitre azalaki koganga: “Ozali libanda ya lisano” Azalaki kozonga kofanda na banc de touche, akopangusa maboko na ye pe akolokota nzete pe akotalisa yango na ngambo ya filet, pe azalaki koloba ntango nyonso: “Nazoyokela moyambi ndembo wana kuna mawa.”]

[Mabe moko ezali te na kobeta lokito, kasi bóbosana te: lokota nzete . . . ? . . . mpamba te Klisto kati na ngai, elikya ya nkembo. Bóloba yango lisusu: Klisto kati na ngai, elikya ya nkembo. Yango ezali nyonso.]

Iyo.

[Yango ezali nyonso.]

Ezali solo.

[Yango ezali nyonso.]

Nyonso. Amen.

[Aleluya. Kowelana pe kobunda ekotikáláká kosala mosala te. Tokomi pene na suka . . .]

Amen.

[. . . ya ngambo mosusu. Tokomi na esika oyo tokoki kozonga sima te. Mbala boni nayoká kapiteni kopesa mbela kati na pépo: “Tokomi na esika ya kozonga sima te.”]

[Eleki ntango molai te nayokaki mongongo moko kouta na mokili mosusu oyo elobelaki ngai, pe nalobaki: “Mwana, okomi na esika ya kozonga sima te.” Yango elingi koloba ete nakomi pene na ngambo mosusu koleka esika oyo nabandaki.]

[Bókanga miso, bógumba motó.]

[Tata na biso na Likolo, topesi melesi pe tozali mpenza kozongisa matondi, na ntongo oyo, ete tokoki koloba na nsé ya motema na biso pe na nsé ya milimo na biso: “Klisto kati na ngai—Klisto kati na ngai, elikya ya nkembo.” Oh, Yesu, tia maboko na Yo ya bolingo zingazinga ya mobali moko moko pe mwasi moko moko, Pe tika ete emoniseli na biso pe miso na biso étala likolo—likolo, likolo koleka, likolo koleka makambo ya mokili oyo, ete tómona Klisto, pe bamosusu bákoka komona Klisto kati na biso. Tía loboko na Yo likolo ya moko na moko ya basali na Yo oyo . . .]

Kokisa yango Nkolo.

[. . . ete bákoka, wana tozali kobima na esika oyo na ntongo oyo, ete tokozua mokano ya komona eloko mosusu te bobele Klisto . . .]

Amen.

[. . . áyambama na kati ya moko na moko. Toyebi ete mosala yango ezali—mosala ya kosala ezali mpenza monene, Yesu; mosala ya kobuka ya elanga ezali monene.]

Iyo, Nkolo.

[Oh, sunga biso, Nkolo . . .]

Iyo, Nkolo.

[. . . ete tósimbana maboko . . .]

Kokisa yango Nkolo.

[. . . pe epanzana na elanga mobimba . . .]

Iyo, Nkolo.

[. . . mpo na kolonga mobúngi pe oyo azali kokufa liboso ete ntango ézala lisusu te.]

Iyo, Nkolo.

[Nalingi ete bótombola loboko pe bósanzola Nkombo ya Nkolo na biso Yesu Klisto.]

[Ndeko Branham ná bato basanzoli Nkolo.]

[Tótelema. Nalingi ete bótombola maboko na bino pe bóyemba elongo ná ngai “Nalingi Ye.” Bolingaka Ye. . . ]

Amen.

[. . . ntongo oyo? Bolingi Ye na motema na bino mobimba? Bótombola maboko pe bóyemba yango, biso nyonso elongo, “Nalingi Ye.”]

[Nalingi Ye, Nalingi Ye,]

[Mpo Alingaki ngai liboso,]

[Pe asombaki lobiko na ngai]

[Likolo na Ekulusu.]

[Bokoki koyemba yango na mongongo ya nsé. . . ]

[Boyebi, bino baninga batei, na Argentine tosangisaki bato koleka 400 000 na liyangani moko; mbala na mbala tomonaka bato ebele. Pe nazoyeba lisusu na mpokwa ya liboso, tozalaki na bato koleka 400 000 oyo bazalaki koyemba yango na Espagnol, pe nasengaki bango báyemba yango na mongongo ya nsé, na libanda ezalaki na bato 300 000. Tosengaki na bato oyo bazalaki na kati báfanda kimia mwa moke wana bato oyo bazalaki libanda bazalaki koyemba maloba ya nzembo yango na mongongo ya nsé. Pe na mbala moko, wana bazalaki koyemba yango, eloko moko etondaki na elimo na ngai. Natikálá koyeba ata moke te liboso na bomoi na ngai emoniseli ya Klisto kati na ngai kino nayokaki mbélélá ya bato 300 000 na libanda bazali koyemba yango na mongongo ya nsé “Nalingi Ye” kuna libanda. . . ? . . . ntongo oyo ezali mapinga monene mpenza ya Mokonzi na nkembo, pe bazali koyemba. Bango balingi nani? Bino bolingi nani?]

Iyo.

[Klisto, Klisto kati na ngai.]

Iyo.

[Elikya ya nkembo. Bókanga miso, bótombola maboko, bóyemba yango lisusu, bino nyonso.]

Iyo Nkolo.

[Nalingi Ye, nalingi Ye,]

[Mpo Alingaki ngai liboso,]

[Pe asombaki lobiko na ngai]

[Likolo na Ekulusu.]

[Soki bolingi Ye na ntongo oyo, bótia loboko na bino zingazinga ya bandeko misato to minei: pe bino basi bósala bongo pe; pe bóloba: “Nalingi Nkolo Yesu Klisto.” Bongo nde; bótia loboko na bino zingazinga. . . —N.D.E.]

<sup>337</sup> Soki nakoki komona likambo ya boye kosalema na mokili mobimba, nakoloba: “Nkolo, tika moombo na Yo ákende na kimia!”



*BONZAMBE ELIMBOLAMI* LIN61-0425B  
(The Godhead Explained)

Liteya ya Ndeko William Marrion Branham oyo, eteyamaki liboso na Anglais mokolo mwa mibale na ntongo, mokolo mwa 25, sanza ya minei, na mobu 1961, na Holiday Inn, Chicago, Illinois, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2015 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)



## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)